

## DION

### Dion Iesu Keriso oisewa sen

#### *Iesu piup ma taueniwa*

<sup>1</sup> Ere mangan ap mepe God Nop Oit mega, Iesu, wande en. Nop ame God den, amba Nop ame God di. <sup>2</sup> Tavewa di, ere mangan me God den wande en. <sup>3</sup> Me gamup wan dim dim iragi venat mutan, amba me gamup gine mawap da ya wandia. <sup>4</sup> Me inap ap mepe inak, amba inak ame waenapan iragi ganat mugawa. <sup>5</sup> Ganat ame sisipu yagiriniwa, go sisip ganat ya toboriniwa.

<sup>6</sup> Wam nugawa gapan God apan da watu eneni, me yaua Dion.

<sup>7</sup> Dion ganat tavewa iragenawa ewamopen menan tauen, amba me gamup waenapan iragi anu tumat tapen menan tauen. <sup>8</sup> Dion mek ingane ganat uon, go me mondi waenapan ganat tavewa ewamopen tauen. <sup>9</sup> Iesu ganat tavewa di piup ma gapan tauiniwa. Me tauepi ganasewa iragi enup piup ma gapan mun ge mun aiwan-data.

<sup>10</sup> Ere mangan wan dim dim iravi Iesu gamup venasen go me piup ma gapan taue wandeni, waenapan irewa ya yawan anu awane. <sup>11</sup> Piup ma mek megawa di tauen go me taueni me waenapan megawa tandayasene. <sup>12</sup> Go da iragi Iesu warepiwa amba anu tumat me yaua gapan tapiwa, Iesu tamana di diamon God otu waiwa entan mumeta. <sup>13</sup> God otu waiwa entan-  
moni ame waenapan deniwa gapan uon, inewa

mamewa anut muga gapan uon, waenapan muk ingane anut muga gapan den uon, go Iesu anu tumasene gapan otu waiwa entanamon yanane.

<sup>14</sup> Nop ame entanen apan venasen amba wandet megawa nu yaumakanup. Oya oya mega nu yawaton. Oya oya mega aigap iragen iwa God mek otua daiton iragenawa di. Me imu pose wat aipakam ge nop tave iragenawa no dotouen.

<sup>15</sup> Dion nop tavewa Iesu menan ve anega wai-wandin, “Apan daiton menan wainginawa, me ewanap oniwandini, me aritawa go ne uon, iwa me namunap yaibobot ine wande oniwandin.”

<sup>16-17</sup> God iup Mosis gamup nuneni ame wat aipakam erewa go endi nop tave iraganewa Iesu gamup tauen, iwa me imu pose kakaewa no dotoueni gapan wat aipakam mega arugataet tauini ame aigap aigap iragi waritoniwa. <sup>18</sup> Orup da daiton God ya di yaven, go God Otua daiton megenat Mamewa yave anun iwa mek Mamewa mainep wandiniwa. Amba me piup ma taueni God Mamewa irewa to ewanen.

### *Dion me da?*

<sup>19</sup> Apan Dion gutut mega mam. Wam ame Diu pa Ierusalem gapan pirisi gauarape mugawa den watu enamone Dion inap tauan, singui wayawan, “Ge da?” <sup>20</sup> Dion ya wa umen go oit aroga wadiamon, “Ne God om enuni apanewa, Keriso uon.” <sup>21</sup> Boge mu singui wayawan, “Go ge da? Ge apan Elaidia go?” Me gare wan, “Ae, ne ap uon.” Mu sia wayawan, “Ge God nop mega wataget waingianawa apanewa ameme go?” Me gare wan, “Uon.”

<sup>22</sup> Uiwa mu anega wane, “Ge da? Nop garewa nuna wat anet watu enanene nagirewa wadiamot. Gek ingane oitaga anen waingi?”

<sup>23</sup> Wataget God nop mega waiwandini apane Aisaia nop wani mini Dion gare anega wan, Ne at kaimewa gapan pua opata waingina apanewa.

Ayop negin mega wat tamanamene amba tauep.

<sup>24-25</sup> Wam ame gapan Parisi nagirewa upi sia apan Dion singui anega wayawane, “Ge God om enuni apanewa, Keriso uon waingi o Elaidia o God watageta noa waiwandini apanewa ameme uon waingi, go ge iwa dimen dup iamuingi?”

<sup>26-27</sup> Dion gare wan, “Ne kaum gapan dup iaivin go apan ame evinap oniniwa, me aigap iragenawa menan pusi okomu damigewa en veta veta ne umanap uon. Go apan ame daiton da yau-makayap yonini e oare.” <sup>28</sup> Nop mame gare gare wane arewa kaum Diodan asepgan, at Betani ap mepe Dion waenapan dup iamuiwandini gapan.

### *Iesu God Man Sip Mega Otua*

<sup>29</sup> Inane woup sen Iesu Dion inap oniwandin yaveni anega wan, “Ase yawan, God man sip mega otua, waenapan koewa nuga garewa wat museta. <sup>30</sup> Apan ase me menan om tan anega wana, me ewanap oniniwa me aritawa di, go ne uon iwa me namunap yaibobot ine wande oniwandin. <sup>31</sup> Ne namu nek den Iesu oare, go Isurero nagirewa Iesu anu awapen menan ne tauan dup iamuiwin.”

<sup>32</sup> Boge Dion Iesu guturewa wadiamon, “God Guewa nenip Bairantan mini visiwandin wapip

doreni yawan. <sup>33</sup> Namua me da ne oare go waenapan dup iamopen watu enanegeni manega wadianegeni menan ne asigip tan, ‘Apan ansena yawa Guewa vise gamup dorepi ameme evi Guewa Woup Seniwa den dup iamuiwandata,’ me ap anega wadianegen. <sup>34</sup> Ne yawan tavewa di venasen menan wadiaivin, Apan mame God otua di.”

### *Iesu wadiamot mega erewa*

<sup>35</sup> Inane woup sen Dion wadiamot mega dere den ap mepe sia yoniwanumun, <sup>36</sup> Iesu ap aiwandini Dion yave anega wan, “Yawan, God man sip mega otua.” <sup>37</sup> Wam ame Dion wadiamot mega dere nop wan anunewa, mu Iesu ewap amon.

<sup>38</sup> Iesu ewagai entane yaveni ewap onam wanumune yawamo singui wan, “E dim da men anuiwanin?” Mu gare wan, “Rabai, ge amba iningi?” Nop Rabai wane gueguewa ame wadianiniwa apānewa.

<sup>39</sup> Iesu gare wan “Onaen, amba e yawai.” Ap menan mu amon amba inini arewa yawan, amba wam ame yaugai tanan wanumon. Wanumone aeni wam airase degedeawa wareni menan ap mepe inane. <sup>40</sup> Apan dere ame Dion wan anun Iesu ewap amone ame dawa Anduru, Saimon Pita gwaniwa. <sup>41</sup> Gine tutup Anduru ae tasewa Saimon tautane wadien, “Nu God Mesaya mega yawaton.” Mesaya tavewa ame Keriso amba gueguewa ame God om enuni apanewa. <sup>42</sup> Amba tasewa waren Iesu ine aen. Iesu kem kem yave anega dien, “Ge Saimon Dion yauga Sipas

diagivin” (Sipas tavewa Pita gueguewa gwat bonawan).

*Iesu Pilip ge Nataniero munan wan*

<sup>43</sup> Inane woup seni, Iesu at Galili aet anun. Pilip yowa ta taneni anega dien, “Ewanap onak.”

<sup>44</sup> Pilip me pa Besaida at Galili apanewa, Anduru ge Pita pa muga daitonawa. <sup>45</sup> Pilip ae yop ta apan Nataniero tane anega dien, “God nop namua gapan, apan Mosis ge God oise waine nagirewa apan daiton menan ok sean anega wan. Apan daiton ameme nu yawaton. Apan ame Iesu, Diosep otua, at Nasaret apanewa.” <sup>46</sup> Nataniero anega wan, “At koewa Nasaret! Asepa dim da kakaewa tau onepi menan waingi?” Pilip gare wan, “Onak yao.”

<sup>47</sup> Wam ame Nataniero Iesu ine oniwandin yave Nataniero menan anega wan, “Me mek tamana Isurero apanewa di, me inap ebo da uon.” <sup>48</sup> Nataniero anega wan, “Anenen amba asik tanegean?” Iesu gare wan, “Ne namu ge oma baip iap wanigean yawagen Pilip venaga evi amba wan.” <sup>49</sup> Boge Nataniero aroga wan, “Wadianianawa apanewa, ge God otua, Isurero Ayop nugawa.”

<sup>50</sup> Menan Iesu anega wan, “Ge anu tumat tanegean iwa baip iap wanigean yawagen wana menan. Endi wana ame otu koentu go inak bawarewa evi amba tapen yawanegai. <sup>51</sup> Ne tamana tavewa di wadiaivin, kiman watapep God anea mega Kimani Vitana Apanewa aiganap vitagen doragen taiwanumampinawa e yawanegai.” Iesu ap anega diamon.

## 2

### *Iesu naine mutat wamewa gapan wan kaum iragen entanen wain venasen*

<sup>1</sup> Wam dere uon tani ewap, naine mutat baripewa da sewa bawarewa yaua Keina at Galili gapan tane. Iesu inewa ap mepe den wanden. <sup>2</sup> Amba Iesu ge wa ewamot mega den tanamo naine mutat baripewa ame gapan venamu wane tauan. <sup>3</sup> Ap mepe kaum wain uon tan menan Iesu inewa yone me anega dien, “Mu kaum wain inamup iragi uon tan.” <sup>4</sup> Iesu gare wan “Ae inan, ge dimen wadianeget waan taingi? Ne wam nega ya tauia.” <sup>5</sup> Go Iesu inewa yone waenapan nao nagire ame anega diamon, “Me anen wadiaepi gapan di tan.”

<sup>6</sup> Pa ap me gapan unup no um baware iragenawa nani yamunaet nani yamu daiton pa gwanap seane iwa barip wamewa waenapan arugataet tauepi menan. Unup no um baware iragenawa tat mega mu Diu nagirewa anu tumat muga iupewa gapan. Ian Diu nagirewa anu tumat iup muga arugataet. Iup da ameme orup da pa gwanap aet anupiwa namu pusi nani bigi ware amba unuk aeta. Ap menan pa pa gapan unup no um baware iragenawa daiton daiton tonana sinewa.

<sup>7</sup> Iesu nao nagire ame anega diamon, “Unup no um ame kaum utan gemane no dotou dotou aep.” Me ame wani gapan mu iragi kaum utan gemane unup iragi no dotou dotou aen. <sup>8</sup> Boge me anega sia diamon, “Kaum upi geman tambun barip ma

i apane ine aisen.” Ame Iesu anen wani no usewa gapan di tane.

<sup>9</sup> Amba barip i apanewa kaum wain venaseni ame na anun, go me kaum wain ame amba taueni me oare. Nao nagire kaum ame utan gemiwanumune mugenat asigimup tane. Boge barip ame i apanewa, naine mutat apane ame wandeni vene wan tauen, <sup>10</sup> anega dien, “Waenapan iragi kaum wain kakaewa imumu wareni namu yan seane waenapan venamu wane tauane ame nainewa, amba kaum wain ni nen seniwa ame evi amba yan sene nane aton tainewa, go ge endi kaum wain gega kakaevet gine ambot waingean endi mame waran tauagi?”

<sup>11</sup> Endi mame Iesu yo mega erewa at Galili pa Keina gapan to ewamon. Mame gapan me kiman oya oya mega ta ewamon, ap menan watu enamot mega imu pose waren inap anu tumat tane.

<sup>12</sup> Mame tani ewap Iesu inewa, wa ewamot megawa, ge tase gwani tanam at pa Kaponiam ae wam upinewa den ap mepe wanumone.

*Iesu Ierusalem God Paewa gwanap waenapan gut oimon*

<sup>13</sup> Ian Diu Paina Yamaseni Baripewa tuguinewa wamewa da konintu taiwandin, ap menan Iesu at Ierusalem dot aen.

<sup>14</sup> Ap mepe God Paewa sin gwanap namboya waenapan, man kao, sip ge nenip bairantan une taiwanumun, amba upine wanumon moni entan wantan taiwanumune Iesu yawamon. <sup>15</sup> Boge me gaut bunum nanip tani ware waenapan amba man sip ge kao gut oimon tau amon. Moni entan taiwanumune togoyam wagoyam ta, ge moni

entan taiwanumune watarewa tambu yamu en tanamon.

<sup>16</sup> Iesu nenip bairantan une taine nagirewa anega diamon, “At ma gan iragi tam tau aisen! E anenen menan Mamana God Paewa wat entan tayan wan dim dim une taine paewa mini entanen!” <sup>17</sup> Iesu ap me waniwa, wa ewamot mega wataget God no oise kakaewa gapan seane ame ase anu awane. Ame anega seane, Pa gega men anu gurana menan potana oma yame mini yagiriwan.

<sup>18</sup> Iesu ame tani menan, Ian Diu nagirewa yonan singui anega wayawan, “Endi ge yo ansena da ta ewane yawat gapan aro amun arita mame waran taiana nu anu tumat gimaget!” <sup>19</sup> Iesu garewa anega wadiamon, “God Paewa ma ae wabenagene wam yampoa gwanap ne sia tu waborain.” <sup>20</sup> Go Diu nagirewa sia anega wane, “God Paewa ame tune en apane dere apaan da nani yamunaet nani yamu daiton gapan tu waborane go endi ge waingiana wam yampoa gwanap tu waborat waingi?” <sup>21</sup> Go Iesu God Paewa menan ya waiwandin go mek etua menan waiwandin. <sup>22</sup> Amba Iesu bop ta sia yon wandeni ewap wa ewamot mega nop mame Iesu waniwa ap mepe darinamu purut wan ase anu awane. Amba God oit mega ge Iesu mek anen waiwandiniwa iragi anu tumat tane.

*Iesu waenapan iragi ire yao kakayat mumiwan*

<sup>23</sup> Ierusalem gapan Paina Yamaseni Baripewa tuguiwanumune Iesu ap mepe den wande yo ge paua ugup ugup taiwandin waenapan arugataet to iamen, yawan anu tumasiwanumun. <sup>24</sup> Go Iesu



mek ae anuiwandini ya anu tumat mumiwandin iwa me waenapan imumu potamu asigip tan. <sup>25</sup> Den me anuiwandini orup da yone waenapan oitamu me da ya wadieta. Iwa waenapan imu pose anenen anuine me asigip tan.

### 3

#### *Iesu ge Nikodimas*

<sup>1</sup> Ap mepe, Ierusalem gapan, Parisi apan da yaua Nikodimas wande en Me Diu nagirewa namu yoyo muga da. Gutut mega mam. <sup>2</sup> Me muma Iesu inap taue anega wan, “Wadianiana apanewa, nu asiginup ge wadianet da God inap ongean. Iwa ge yo ugup ugup taianawa, orup da God me inap ya wandepiwa ge taianawa mini ya tata.” <sup>3</sup> Nop garewa Iesu aroga anega wan, “Ne tavewa di wadiagivin, God toemu mega orup da daiton ya unugeta. Orup da me Guewa Woup Seniwa gapan ya yanepiwa me God toemu mega ya unugeta.”

<sup>4</sup> Nikodimas singui anega wan, “Apan arita tani anenen amba sia yaneta? Tavewa di me inewa potap unuk ae wam derewa sia yaneta go?” <sup>5</sup> Iesu gare wan, “Ne tave di wadiagivin, orup da me kaum ge Guewa Woup Seniwa gapan ya yanepiwa me God toemu mega ya unugeta. <sup>6</sup> Etua gapan yanepi etua di, go Guewa Woup Seniwa gapan yanepi ame guewa di. <sup>7</sup> Ne sia di yanapen menan waingina anu seke ya ta. Ge iravi tanamo mek sia di yanan.

<sup>8</sup> Taik arik ansena tauat anuini gapan tauen aewan. Ge taik ununkewa megenat anui, go at

ambe gapan oniwan o at ambe gapan aewan ge anu wawa da umap uon. Ap mini daiton daiton Guewa anuini gapan yanapen.”

<sup>9</sup> Nikodimas singui sia anega wan, “Ma anenen venaseta?” <sup>10</sup> Iesu gare wan, “Ge Isurero nagire wadiamot mugawa dimen ge inak ma iragi ya anuitamiagi? <sup>11</sup> Ne tave di wadiagivin, nu asiginupe gapan waivin amba gutut waitoni ame yawatoni gapan waivin, go waenapan e gutut nuga ya di anuyan warisi. <sup>12</sup> Ne piup guegue mega wadiagena ge ya anu tumat nimanegean. Anenen amba kiman guegue mega wadiagepena ge anu tumat nimanegai?”

<sup>13</sup> Waenapan daiton da kiman ya dot aen, go daiton megenat kimani aoma taueni, ame ne, Kimani Vitana apanewa. <sup>14</sup> Mosis mokare guewa at kaimewa gapan iap eneni mini, Kimani Vitana apanewa paina ao iap enain. <sup>15</sup> Ap menan da da ne anu tumat nimanegepiwa inak yaibobot warain.” Iesu ap anega wan.

<sup>16</sup> Iwa God piup nagirewa munan bumaga tantan anu gurení menan otua daiton iragena nunen. Ap menan da da God otua anu tumasepiwa guamu ya wakaumain go inak yaibobot warain. <sup>17</sup> God otua watu enen piup ma taueni tavewa waenapan wanene tamopen menan ya tauen, go me gamup waenapan inak warapen menan tauen. <sup>18</sup> Mu da da anu tumasepiwa koewa gapan wanene ya tamota, go mu da da ya anu tumasepiwa gaseget God wanene mega gapan yonane, iwa God otua daiton iragenawa ya anu tumasene.

<sup>19</sup> God wanene ame tamopi tavewa ame mam, ganat piup tauen, go ya anu tumasene nagirewa mum sisip imumu wareni menan ganat tandayasene iwa mu inak muga koevet. <sup>20</sup> Mu iragi koewa taine ganat tandayasiwanum, iwa koewa muga ganat arogamepi tawa menan mu ganat gapan ya tauain. <sup>21</sup> Go mu da da ganat warane den tamana ininewa, ganat inap tauain iwa mu den aroga ase yao anuin ame mu dim da tainewa mu God gamup taiwanum.

*Dion, dup iamuiwiwa, Iesu guturewa wan*

<sup>22</sup> Mame ewap, Iesu amba wa ewamot megawa at Diudia arige use amone, ap mepe wam animpo mini den tanamo wandeni amba anu tumat dupewa iamuiwanumune. <sup>23</sup> Ap wamewa at ugupewa at Aenon, at Seilim konintu, Dion dup iam wandin, iwa at ame gapan kaum aruga, amba waenapan aruga pot poraet dup iamot wan tauiwanumun. <sup>24</sup> Mame tane ewap ita nagirewa Dion waran gwat noke baraene.

<sup>25</sup> Dion wa ewamot megawa amba Diu apan da den God yamap bigip muga wat mutapen gueguewa menan notatae waiwanumun. <sup>26</sup> Mu Dion ine tauan anega wane, “Wadianiana, apan ap me ge den Diodan asepgagan daiton menan guturewa wawa kakayat taingianawa, ame waenapan dup iamuiwan, amba mu iragi me inap amuiwanum.”

<sup>27</sup> Dion gare wan, “Apan da tat mega aroewa God kimani wanini gapan megenat taiwan. <sup>28</sup> E ek gutut nega wana anuyan, ne, God om enuni apanewa, Keriso uon go ne me namup watu

enanegen ongena apanewa. <sup>29</sup> Waenapan negawa, waen apan ganganaseni megawa di. Apan ame, me evenewa, naine mutat gapan me amase taiwandata. Menan naine mutat apane noa anupiwa me aton anuta. Ne naine mutat apane evenewa mini amba aton ame negawa potanap no dotouen iwa Iesu taueni menan. <sup>30</sup> Iesu ne aiganap aiwandata go ne me gauarap angingain.”

*Da kimani visen?*

<sup>31</sup> Kimani viseni apanewa me aigap iragenawa. Go piupa yaneni apanewa piup megawa, amba piup guegue mega wainiwa. <sup>32</sup> Kimani Viseni apanewa dim da aupa yaveni ge anuni oisewa waiwan go waenapan noa ya wariwanum. <sup>33</sup> Apan ansena da Iesu nop mega ware di anu kakayaseni, me aroga ase manega wata, “God ame tavewa di.” <sup>34</sup> Iwa God wa watu eneni apanewa, Iesu God oise wainiwa iwa God Guewa Woup Seniwa om aigapewa Iesu waniniwa. <sup>35</sup> Mamewa otua menan anu gureni menan dim dim iragi Otua nani bagup baraen. <sup>36</sup> Orup ansena me God otua anu tumasepiwa inak yaibobot wariwandata, orup ansenawa da God mek otua tandayasepiwa me inak da ya wareta go God nemoro mega ware me inap baraeta.

## 4

*At Sameria waen da Keriso gamup inak waren*

<sup>1</sup> Ian Parisi nagirewa Iesu nop oit mega anune me waenapan wa upamuiwandin ge dup iamuiwandin arugataet ewap amuiwanumune, go

Dion ewap amuine aruga uon. <sup>2</sup> Go dup ame Iesu ya iamuiwandin, go wadiamot megawa ame taiwanumun.

<sup>3</sup> Ambagan Iesu ian Parisi nagire nop ame Iesu menan waiwanumune anuni at Diudia ame ae ve ewagai at Galili sia aen. <sup>4</sup> At Diudia ge Galili nimakamup at Sameria wanden, ap menan Iesu piup Sameria tau ge tau aiwandini. <sup>5</sup> Sewa da ap mepe Sameria gapan yaua Saika tauen, at piup da watageta apane Diekap otua Diosep ire di ve waneni ame mainep. <sup>6</sup> Diekap kaum men urat ware tu matakameni ap mepe wanden. Amba Iesu ap nonongataet oniwandin wam ianupewa wareni menan epi torot wan amba kaum tu matakamene ame no kaimap ae wanden.

<sup>7-8</sup> Iesu kaum no kaimap wandeni, wam ame den wadiamot mega vean at sewa baware da ame taba une tapen amon. At Sameria waen da kaum urat ame gapan utapen tauen. Iesu waen ame anega dien, “Kaum da ut nena napena umap?”

<sup>9</sup> At Sameria waen ame gare anega wan, “Ge Diu apanewa amba ne Sameria waen go endi ge kaum ut genapen waingi?” (Sameria nagirewa naine sipewa ian Diu sip ame gapan sia ya nain, amba ugup ugup ap mini den iwa mu dere anavi wanumamun.)

<sup>10</sup> Iesu sia wadien, “God genat anuni ge oare amba kaum mut nenat wana ne da ge oare. Anu nimanegepo amba God genat anupo, ge mup inanap wapo, ne inak yaibobot kaumewa genapo.” <sup>11</sup> Waen ame Iesu anega dien, “Ge yaibobot kaumewa ame endi amba utai? Kaum aipa urata diawa, den ge kaum uta uta pokewa

da ya waraana. <sup>12</sup> Endi waingiana ge yauga ao waran mamanu Diekap yaua aoma waringi, me urat ma ware kaum tu matakam nuneniwa megenat gamup naivin. Otu waiwa ge man tap megawa iragi ap mepe den naiwanumun.”

<sup>13</sup> Iesu gare sia wan, “Orup da kaum iragen ma napiwa me megewa sia pakaraiwandata. <sup>14</sup> Go orup da kaum ne wanapen napiwa, me megewa sia ya pakaraeta. Amba tave di kaum ne wanapena ame kaum urewa bot bot yaugai potap di tauiwandata ame yaibobot inagewa tau-taneta.” <sup>15</sup> Waen ame Iesu anega dien, “Enda, kaum ure dena ame nen! Napena megana sia ya pakaraep amba urat ma gapan kaum utapen menan da sia ya ongep.”

<sup>16</sup> Iesu waen ame anega dien, “Ak, memaga wadia, dere sia onaen.” <sup>17</sup> Waen ame entane gare anega wan, “Ne memana da uon.” Iesu waen anega sia dien, “Ge memak uon waana ame tavewa di waan. <sup>18</sup> Ge namu apan nani yamunaet naimoana, go endi apan den wanik agiana ame ge memaga uon. Tavewa di, endi ge gaseget memak uon waana ame tavewa gapan di waan.”

<sup>19</sup> Waen ame Iesu dien, “Enda, ne anuingina ge God nop mega waiana apanewa da. <sup>20</sup> Nu at Sameria isimuran ge omayan bae wataget tunup ma gapan God wa taragasiwanumun, go Diu nagirewa e anega waiwanin, wa taragaset arewa Ierusalem gapan megenat di.”

<sup>21</sup> Boge Iesu anega wani, “Waen negawa, anu tumat nimanek, wam konintu taiwan amba e Mamana God tunup ma gapan ya anu tumatai amba Ierusalem gapan den ya anu tumasiwaniai.

<sup>22</sup> Ian Sameria e wa taragaset ega tavewa ya anuiwanin go nu Diu nagirewa wa taragaset nugawa iwa mega den anuivin, iwa inak ibariwa Diu nagirewa inamup tauen aewan. <sup>23</sup> Wam usira wandeni onin en endi gaset tauen ame waenapan Guewa Woup Seniwa ge tavewa gamup Maman God wa taragatain. God waenapan ap umapewa God yomu taiwan. <sup>24</sup> God me Guewa di, ap menan Guewa aro amun megawa tavewa gapan waenapan Maman God wa taragasep.” <sup>25</sup> Waen ame sia anega wan, “Ame tauepi ne asiginap, me Mesaya inak nunini apanewa Keriso, me tauepiwa anu tumat nuga guegue mega iragi wa ewaneta.”

<sup>26</sup> Waen ame ap anega wani, Iesu gare entanen aroga anega dien, “Inak enini apanewa mame diagivin.”

<sup>27</sup> Iesu nop ame waiwandini, me watu enamot mega taba une tapen amone sia entan tauane. Tauan yawane Iesu waen ame dere nop waiwanumune yawane anu bambamat anune go singui manega da ya tayawane, “Ge dim menan waen inap nop waingi, dim menan nop dere waiwanin?” <sup>28</sup> Boge, waen ame kaum pokarik mega ae veniwa, entane sewa bawarewa ame sia ae waenapan anega diamon, <sup>29</sup> “Onaen, apan da ne da ya anuina ge da ya taina noa iragi wadianegeni ame yawan. Endi anuiana ameme God om enuni apanewa Keriso di, go?” <sup>30</sup> Boge waenapan pa sewa ame ae vean tauan Iesu yawapen amon.

<sup>31</sup> Pa sewa nagirewa onam wanumunewa Iesu watu enamot megawa nanamasen anega wane, “Wadianet nugawa, taba ma wat nan.” <sup>32</sup> Go Iesu anega diamon, “Ne taba nega wandia go e asigip

ya tayan.” <sup>33</sup> Iesu nop ame wani, watu enamot mega gare gare ase ma manega wawa mutan, ‘Orup da taba gaset tam taue wanen nan?’

<sup>34</sup> Ame waiwanumune anuni, Iesu anega wani, “Watu enanegeni anut mega navewa amba nao mega neneni taitamepena ame ne taba negawa. <sup>35</sup> E asigiap e naewa veranewa, siragam degede uon tapi ame maup wamewa. Ne wadiaep, yamaya uarenan nao egak yawan gaseget maup taue aen daupam menan inin geraget tan wandia. Go God daupam mega wam wam di wande aiwandata. <sup>36</sup> Daupam taini apanewa garewa mega tawanane wariwan ameme maup taue aeni ame bongamiwan. Maup ame tavewa Iesu anu tumasine nagirewa. Mu inak yaibobot wanumoin. Ap menan vereni apanewa ge daupam taini apanewa mu dere aton tain. <sup>37</sup> Wataget wane nopewa ame tavewa di,

Apan da verepi amba apan dawa daupam tata.

<sup>38</sup> Navewa e ya tayan go taba maupewa taueni bongamepen menan watu enaen. Ame waenapan upinewa nao kaimakaet tane, go nao muga ginewa e ta yon borapen aisewan.” Iesu ap anega wan.

*Ian Sameria nagirewa arugataet anu tumat tane*

<sup>39</sup> Waen ame Iesu yave oisewa wan anune menan Ian Sameria nagirewa pa sewa baware ame gapan wanumune iragi Iesu anu tumasene.

Waen ame pa nagirewa anega wadiamoni, “Ne da ya anuna da ya taina noa aruga me wadianegen.” <sup>40</sup> Ap menan Sameria nagirewa Iesu ine



tauan kaimakaet wan watanane. Ap menan Iesu mu tanamo wam dere wanden.

<sup>41</sup> Ap mepe wandeni gapan me nop mega waiwandiniwa waenapan imu pose wat entanen boge arugataet anu tumat tane. <sup>42</sup> Mu iragi waen ame anega diane, “Nu, ge Iesu oise wadianeana ap me megenat anu tumat ya taivin, go me nop wani nuk anutoni gapan. Tave di, apan mame waenapan wat inakam mumini apanewa.”

<sup>43</sup> Wam dere uon tani ewap, Iesu at Galili di aen. <sup>44</sup> Iesu namu da anega wani, “God nao mega taini apanewa at piup mega iragenawa nagirewa viriwa da ya tainewa.” <sup>45</sup> Amba me at Galili taueni at ame nagirewa iragi atonu den Iesu warupane. Iwa mu iragi Ierusalem gapan wanumone, Paina Yamaseni Baripewa gapan Iesu yo mega ugup ugup taiwandini mu iragi ap mepe den yaviwanumun.

*Iesu nao aritawa apanewa otua da wat inakamen*

<sup>46</sup> Wam da sia Iesu me at mega daio sewa bawarewa Keina at Galili aen. Wataget ap mepe me yo mega erewa tan, kaum iragen wan wain venasen. Den ap mepe Kaponiam apan aritawa da otua vege den at Kaponiam gapan iniwandin.

<sup>47</sup> Apan ame Iesu at Diudia gapan one at Galili taueni oisewa anuni menan me ae Iesu inewa taue noek noek manega waiwandini, “Vit onak ne otuna wat inakamepen iwa otuna bop konintu di.” <sup>48</sup> Iesu anega dien, “Ne yo nega paua ugup ugup tapena yawanaget anuyan taiwanin? Yo ya tapenawa e ya anu tumat nimanegai.” <sup>49</sup> Nao aritawa apanewa ame anega wani, “Ayop otuna

boepi tawa menawaet vit onak.” <sup>50</sup> Iesu gare wan, “Ganawan ak otuga inakaeta.” Apan ame Iesu nop mega anu tumaseni ao yon wande di aen.

<sup>51</sup> Apan ame neginaet di aiwandini nao nagire mega onamon negina tautanan, otua oisewa anega wadiane, otuga gaset kakae tan. <sup>52</sup> Apan aritawa ame singui wayamon, “E wane anup otuna wam airase ansenawa gapan inak waren?” Mu anega wadiane, “Wata wam airase daitonawa gapan otuga kakae tan.”

<sup>53</sup> Boge Kaponiam aritawa apane anuni, wam airase daitonawa ap omewa gapan Iesu anega me dieni, “Ge otuga inakaeta.” Ap menan apan ame ge waenapan pa mega gapan ininewa iragi Iesu anu tumasiwanumun. <sup>54</sup> Mame Iesu at Diudia gapan ase ma taue yo mega derewa pa Keina, at Galili gapan taniwa.

## 5

*Iesu kaum awan etop vek apane da wat inakamen*

<sup>1</sup> Wam ame ewap da, Diu nagirewa barip muga menan Iesu pa Ierusalem dot aen. <sup>2</sup> Pa Ierusalem gapan tonan da yaua Man Sip tonane diane. Tonan ame mainantup kaum awan da ian Iburu nop muga gapan yaua Betsaida diane. Kaum awan ame etop, pa namdat nani yamunaet ikukuk tumone.

<sup>3</sup> Ap mepe enkana ankana nagirewa arugataet ininewa, upi yame borat mutanewa, upi pusi nani gejerawa, upi ugu wapi in wandeniwa.

<sup>4</sup> At ame nagirewa anu tumat manega taiwanumun, Anea da vise kaum awan (yaua Betsaida)

menawasep amba orup da kauma awan gapan namu tauepi etua kakae tata. <sup>5</sup> Ap mepe vek apane da pusi nani in wandeniwa en mega apane daiton aonagaet nani yamunaet nanin yamu yampo (38) wande en.

<sup>6</sup> Wam ame Iesu apan ap mepe iniwandin yaveni gapan me anu aven, apan ma vek tan en nonongataet di wanden. Me singui inap wan, “Ge inak warat anuingi?” <sup>7</sup> Apan ame gare wan, “Kaiwan, ago da uon, orup da inanap mapa uon ago nenep ae kaum menao manao taini gapan taua taua. Nek ta yawan ae tauapen taingina go upi namunap vit amone namu ae tauiwanum.” <sup>8</sup> Boge Iesu inap anega wan, “Ao yon, eragi gega pait ae ma wara ak.” <sup>9</sup> Ame no utap apan inakaen. Me eragi mega ae ma ware boge aen. Yo mame venaseniwa, Diu nagirewa wagat wamewa gapan gapan.

<sup>10</sup> Ap menan Diu nagirewa inak wareni apane inap wane, “Diu pura muga bawarewa wagat wamewa ge eragi waran ingiana ame iup paina yamasingi.” <sup>11</sup> Go Iesu gare anega wan, “Apan ansena tanegen inak warana ame inanap anega wan, eragi gega pait ae ma wara ap ak.”

<sup>12</sup> Menan mu singui anega tayawane, “Ame orup ambe da wan amba ge eragi ae ma wara ap agean?” <sup>13</sup> Inak waneni apane me oare ame da, iwa Iesu boge ap mepe waenapan barat mutane gapan karaua totnak taue yaumakamup aen.

<sup>14</sup> Evi amba Iesu apan ame God Paewa gwanap taneni anega dien, “Yao anu kakayat, ge gaset inak waraan. Ap menan koewa da sia ya ta iwa

koewa iragenawa da sia waragepi tawa.” <sup>15</sup> Apan ame aeni taue Diu namu yoyo nagire anega wadiamon, “Wat inakam nimanegeni apanewa ame yaua Iesu.” <sup>16</sup> Ian Diu nagirewa Iesu inap wawa koko tane, iwa Iesu wam pura bawarewa iupewa to paiseniwa amba apan ame den wat inakameni menan.

<sup>17</sup> Iesu anega diamon, “Ne Mamana God nao mega ta onin en mame tauia, ap menan ne den nao taivingain.” <sup>18</sup> Ap menan ian Diu nagire Iesu topen menan anu sisimen taiwanumun, iwa wam pura bawarewa iupewa to paiseni megenat uon go God mek mame iragena waiwandiniwa amba mek ingane God den om inat wa taiwandini menan.

### *God Otua inak ibariwa*

<sup>19</sup> Iesu garewa manega wadiamon, “Ne tave di wadiaivin, ne Mamana God otua ne di, ap menan dim dim da ne negenat ya di tain iwa Mamana dim da taniwa ne gaset yawana gapan ap umape megenat di taingapen iwa ne, God otua, Mamana umapewa tainawa. <sup>20</sup> Mamana nenan anu gureni menan dim da anun taini ta ewanegiwan. Yo ugup ugup yawayana ame gauarap, evi amba Mamana ewanegep ne yo aigape di taingain e yawane amba kuin tarak wai. <sup>21</sup> Ne Mamana waini bop tane nagire inak musinewa. Otua ne ap mini orup da da imuna warepiwa ne inak wanain.

<sup>22</sup> Mamana waenapan wanene ya tamota go wanene tata aroewa ne nenen. <sup>23</sup> Ap menan waenapan iragi i omani seane Mamana viriwa taine mini ap anega ne inanap tain. Menan ne

otua Iesu waenapan viripana ya tapi Mamana, ne watu enanegeni, viriwa mu den ya tain, iwa Mamana watu enanegeni menan.

<sup>24</sup> Nop tavewa di wadiaivin, da da nona anu amba wa watu enanegeni apanewa God anu tumasepiwa inak yaibobot wariwandata. Orup ame God ya wanene tata go bop arewa gapan am ninigame inak arewa dotou aen.

<sup>25</sup> Ne tave di wadiaivin, wam usira wandeni onin en ma gaset tauen bop nagire God otua nona anuin amba mu da da anupiwa inak warain.

<sup>26</sup> Mamana me mek inak urewa di menan, me otua, ne, inak urewa nenen. <sup>27</sup> Amba ne wanene tapen aroewa nenen iwa ne Kimani Vitana apanewa. <sup>28</sup> Ap menan seke ya tane, wam oniwan borit wane nagirewa nona anu <sup>29</sup> ao yon wanumoin, mu kakae tane nagirewa mu ao yone inak warain, go mu koewa tane nagirewa ao yone wanene tautanain. <sup>30</sup> Ne nek ingane dim da ya tain, go dim da Mamana wadianegeni ap gapan wanene tamuivin. Ne wanene nega tamana iragen iwa ne nek nenan ya taivin go Mamana imu pose warapen menan taivin.” Iesu ap anega wan.

### *Iesu inak gueguewa*

<sup>31</sup> Iesu sia anega wan, “Ne nek ingane oit nega wapenawa, oit nega aroewa uon. <sup>32</sup> Go God oitana waiwan amba ne asiginap anenen me oit nega wainiwa ame tavewa di.

<sup>33</sup> E Dion inap singui tayawapen menan waenapan watu enamoyan amba me oit nega tavewa di wadiaen. <sup>34</sup> Ne waenapan da oitana wapen

menan yowa ya taivin go Dion ne oitana wadiaeni gapan e inak warapen menan nop mame wadiaivin. <sup>35</sup> Dion me dun mini yagire ganasewa muniwandin, ap gapan e wam koni otu da ganat mega atonu tayan. <sup>36</sup> Go ne inak nega gueguewa itaniwa aigap Dion mega mini uon. Nao nega iragena Mamana taitamet wa nenen, mame di taivin. Nao nega mame tavewa wadiaivin ame God wa watu eneni apanewa ne me di.

<sup>37</sup> Amba Mamana watu enanegeni mek ingane gutut negawa waiwan. E Mamana nop waini da ya anuyan o irewa da ya yawayan, <sup>38</sup> o nop mega potayap dugup ya waren wandia, iwa e ya anu tumasiwanin me daiton da ne watu enanegeniwa.

<sup>39</sup> God nop mega namua ok seane pot pot batnagiwanin iwa nop ame gwanap inak yaibobot warayana anuiwanin. Nop ame oitana waiwan. <sup>40</sup> Go e inanap tanda taiwanin inak wara wara menan onaet ya anuiwanin.

<sup>41</sup> Ne apan wa atonat mega ne ya warain, <sup>42</sup> go ne asik taena ame, God baigan mega potayap ya wandia. <sup>43</sup> Ne Mamana Kimaniwa yaua gapan tauan, go e ya waranegean, go ne asiginap orup ugupe da ambagan mek yaua gapan tauepi, e menawaet warai. <sup>44</sup> E gare gare wa atonat taiwanin go God wa atonat imaepen yowa ya taiwanin ap menan anenen amba anu tumat nimanegai?

<sup>45</sup> Go Mamana namup e tandayat nimanegiana menan ne ya anu koeragam imain go Mosis, e anu daviana apanewa, me anu koeragam imaeta.

<sup>46</sup> E Mosis anu tumasiwaniampinawa, ne den anu

tumat nimanegai, iwa me ok nenan se wan. <sup>47</sup> Go Mosis ok se wani ya anu tumaseana, anenen amba ne wapena anu tumat tai?” Iesu ap anega wan.

## 6

### *Iesu waenapan arugataet (5000) mini watumon*

<sup>1</sup> Wam mame ewap, Iesu kaum awan Galili kabum gagap to nuguse eto yamu dotou aen, kaum awan ame yaua dawa wainewa, Taibirias.

<sup>2</sup> Iesu yo mega paua ugup ugup ta vek nagire wat inakam mumiwandin gase yawane menan waenapan iragi to iamen ewap kaum etop ikukuk pusimup amon. <sup>3</sup> Boge Iesu togan dot ae wadiamot mega tanamo den wanden. <sup>4</sup> Wam ame gapan ian Diu nagirewa Paina Yamaseni Baripewa konintu tauiwandin.

<sup>5</sup> Ap mepe wanumone Iesu yangut tani waenapan arugataet da to iamen inewa onam wanumune yawamon. Menan Pilip anega dien, “Nu taba une amba tat waenapan aru ma munat nain?” <sup>6</sup> Me singui ame wani mondi Pilip pusip warup yawapen menan, go anenen ta ta inagewa me gaset anun. <sup>7</sup> Pilip gare anega dien, “Akae Ayop, nu bodu daitona navewa tatawa, garewa nugawa agim make warat, taba une ta munat, ame umap uon, iwa waenapan daiton daiton semu otu otu napi umamup ya tamota!” <sup>8</sup> Amba Iesu wadiamot megawa apane da, Anduru, Saimon Pita gwaniwa, anega wan, <sup>9</sup> “Orup apan otu da mapa buredi magamene nani yamunaet amba meo kamontua dere mapa tambun, go waenapan aru mame mu napi umamup ya di tata.”

<sup>10</sup> Menan Iesu wadiamot mega anega diamon, “Waenapan diamone, ap mepe unawat aigap ae wanumop.” Boge waenapan ap mepe ae wanumone. Apan paua muga arugataet da (5000 mini) wanumon. <sup>11</sup> Boge Iesu buredi magamene ame tambu God inap gaun wan, yan aiman se munen muk anuine gapan amba tam naiwanumun, amba meo ap anega den sia tan. <sup>12</sup> Waenapan taba ame nane iragi umamup tan. Iesu wadiamot mega anega diamon, “Taba nan semua veanewa iragi bongamen, da danam danam ya tapen.” <sup>13</sup> Ap menan buredi magamene ge meo semua veane bongam enane kaenat aonagaet pusinawan dere no dotou wane.

<sup>14</sup> Taba nane ewap, waenapan iragi Iesu yo ame tan yawane anega waiwanumun, “Tavewa di, apan mame God noa waini apanewa da, nu piup ma gapan amase taintoniwa mame tauen.” <sup>15</sup> Waenapan nop barim onamo Iesu nanamase wap ayop muga tapen menan waiwanumune. Iesu ame anuni menan tanda ta megenat togan dot aen.

### *Iesu kaum gagap ap aen*

<sup>16</sup> Wam ame mum gine, Iesu wadiamot mega, mugenat, kaum awan baware Galili ame vit amon. <sup>17</sup> Ap mepe kabum gagap dotouen awan ame gamu to nugusen at Kaponiam amuiwanumune, mum tauen. Wam ame Iesu den intum ya tamon. <sup>18</sup> Ame gapan taik baware tauen kaum tuewa tonagasiwandin.



<sup>19</sup> Mu bara tan awan nimakap tauane (6 kilo-mita mini) ap mepe Iesu kaum gagap ap mu gambenamu oniwandin yawan tap anu guran. <sup>20</sup> Go Iesu anega diamon, “Ma ne, tap ya anune.” <sup>21</sup> Mu boge daramu wan Iesu wat agoasene kabum gwanap dotouen, menawaet kabum amot anuiwanumune arewa gapan awan etop ase enasen.

### *Waenapan Iesu yope taiwanum*

<sup>22-23</sup> Woup seni amba, waenapan, ayop buredi wat aipakam munen nane arewa gapan wanumone, Iesu wadiamot mega mugenat kabum daiton ame gapan dotou amone yawamone. Mu Iesu den ya aet anun iwa kabum dawa da uon. Go ame mumagetawa kabum upi at Taibirias gapan tauan. <sup>24</sup> Menan waenapan yawamone Iesu go wadiamot mega ap mepe den uon, boge mu kabum upi gapan sia dotouan Iesu yowa at Kaponiam amon.

### *Iesu me inak tabaewa*

<sup>25</sup> Waenapan Iesu yowa tane kaum awan ame eto yamune gapan yawane singui wayawivanumun, “Wadianiana apanewa, ge mapa andi tauan?” <sup>26</sup> Iesu gare wan, “Ne tavewa gapan di wadiaivin, ne yona taiwaniana iwa e yo paua nega yawayana menan uon, go iwa e taba nayan bagu kaume yaneni menan sia onayan. <sup>27</sup> Taba koe taini navewa menan ya taiwanian go yai-bobot tabaewa menan navewa taiwanian. Yai-bobot tabaewa ame God Kimani Vitana apanewa, ne, enain. Iwa Mamana God amun mega nene umap wani menan.”

<sup>28</sup> Iesu ame wani mu singui ase sia wayavi-wanumun, “Nu God anuini navewa nu ansenawa da tata me aton anuta?” <sup>29</sup> Iesu gare sia wan, “God nao megawa mam, wa watu enanegeni otua ne di anu tumat nimanek waniampen.” <sup>30</sup> Ap menan mu anega sia diane, “Endi ge yo ansena da sia tai gapan nu yawat anu tumat gimagait? Ge dim da tai? <sup>31</sup> Nu isimuran wainu wataget at kaimewa gapan taba mana nane, Oise Kakaewa gapan ok seane wandia, Me buredi mana kimaniwa munen nane.”

<sup>32</sup> Iesu anega wadiamon, “Ne tavewa di wadiaivin, buredi mana ame Mosis muneni ame kiman tabaewa da uon, ne Mamana taba buredi tave iragenawa kimaniwa di eniwandata. <sup>33</sup> Amba God buredi megawa kimani viseni ameme ne me di amba ne waenapan inak yaibobot muningain.”

<sup>34</sup> Mu sia wayaviwanumun, “Arita nugawa, wam mame use aeniwa gapan buredi mame pot pot nuningan.” <sup>35</sup> Menan Iesu gare wadiamon, “Ne inak yaibobot tabaewa, da ne dirin wapun menan nanamuna tapiwa me enup ya areta. Me ne di anu tumat nimanek wandapinawa, me mege ya pakaraiwandata.

<sup>36</sup> Go ne gaset namu wadiaen, e yawanegiwanin go e ya di anu tumat nimanegisi. <sup>37</sup> Mamana da da imu pose entan ta nenepi ame nanamuna onamoin, ame nenan onamopi ne ya up oimoin. <sup>38</sup> Iwa ne kimani vit ongena, Mamana God dim da anuini tapen menan ongen, nek anut nega men uon. <sup>39</sup> Endi God watu enanegeni apanewa anut mega mam, me neneni

waenapan da daiton mini ya wakaumapen go wam verisiwa tauepi ne tapena inak muse iravi ao yon wanumoin. <sup>40</sup> Ne Mamana anuini ame waenapan ne yawanege anu tumat nimanegepi mu yaibobot inagewa tautanain. Amba wam verisiwa ne tapen inak muse ao yon wanumoin.”

<sup>41</sup> Nop ma wani, iam Diu nagirewa gwen gurut wan notatae wane, iwa me anega wani menan, “Ne Kimani Vitana tabaewa.” <sup>42</sup> Menan mu anega wane, “Ma Iesu apan Diosep otua ine mame nu asiginup iwa dimen me anega waiwandini ne Kimani Vitana tabaewa?”

<sup>43</sup> Iesu anuni me gare anega wan, “Gare gare gwen gurut ek waiana ae vean, <sup>44</sup> Orup da da mu aro muga gapan inanap ya onamoin go Mamana watu enanegeni wa upamopi inanap tauain. Amba ame wam uiwa gapan, ne tapen inak muse ao yon wanumoin. <sup>45</sup> Wataget God nop oit mega waiwanumune nagire ok anega seane, God mek waenapan wadidiamuiwandata. Nop ame tavewa waenapan da da darine pemak Mamana nop wapi anupiwa amba me inap yao asik tapiwa ame nenan onamoin.

<sup>46</sup> Waenapan da Mamana ya yawane, ame God den wandini otua megenat Mamana yaven.

<sup>47</sup> Ne tavewa di wadiaivin, orup da anu tumat taiwandapinawa yaibobot inagewa waretu. <sup>48</sup> Ne inak tabaewa. <sup>49</sup> E isimurae wai wataget at kaimewa gapan taba mana nane go mu borit wane. <sup>50</sup> Go taba endi mame kimani vit oneni ame ugup, orup da napiwa me ya boeta. <sup>51</sup> Ne yaibobot tabaewa Kimani Vitanawa, orup da taba mame napiwa yaibobot wande aiwandata. Taba

mame ne etunawa ame ne iragi piup ma munan inak gamup wariwanumain.” Iesu ap anega wan.

<sup>52</sup> Iesu nop mame waiwandin anune menan, ian Diu nagirewa ugu gangane den nop kaimakaet gare gare anega wane, “Apan ma nive mone anenen nunep nata waiwan?” <sup>53</sup> Iesu anega sia diamon, “Ne tavewa di wadiaivin, e kimani viseni apanewa etua ge deniwa ya nanewa, kiman inak megawa da potayap uon.

<sup>54</sup> Orup da da ne etuna ge denina napiwa mu yaibobot inagewa gapan wanumoin. Amba wam uiwa gapan ne tapen mu inak muse ao yon wanumoin. <sup>55</sup> Ap menan, ne etunawa ame inak tabae iragenawa amba deninawa inak kaume iragenawa. <sup>56</sup> Orup da da etuna ge denina napiwa ame mu ne potanap wanumoin amba ne mu potamup wanik angingain.

<sup>57</sup> Ne Mamana yaibobot wandiniwa watu ena-negen menan ne wanik angin iwa Mamana gamup, ap umap sia orup da ne gamunap inak tabaewa naiwandapinawa me wande aiwandata iwa ne gamunap. <sup>58</sup> E isimurae omae bae taba mana nane borit wane, go taba buredi mame kimani viseniwa menan orup da taba mame na ini-wandapinawa me yaibobot wande aiwandata.” <sup>59</sup> Iesu nop mame waiwandini ame iam iam paewa at Kaponiam gapan wadidiamuiwandin.

### *Wdiamot mega arugataet Iesu ae ve amon*

<sup>60</sup> Nop mame anune Iesu wdiamot mega anega wane, “Ma anenen opata ma kaimake den, da anu wareta?”

<sup>61</sup> Iesu mawap wane go Iesu imua gapan anuni, wadiamot mega aigap doran waiwanumune menan me anega wan, “Nop mam kaimake den waingina menan endao imaewan? <sup>62</sup> Endi ne namu kimani waingena arewa sia angepen yawanege e anenen anui! <sup>63</sup> Mame Guewa Woup Seniwa yonen inak muniwan, go nu etunua inak da ya muniniwa. Ne inak nopewa wadiaena ame God Guewa aroewa gapan tavewa arogameta, amba nop ame inak muniniwa. <sup>64</sup> Endi ne waingina e upi anu tumat ya taisi.” Iesu ame wani iwa ere mangan iragen Iesu me asigip tan orup ansena ya anu tumasiniwa amba orup ambe da omine wata.

<sup>65</sup> Iesu sia anega wan, “Ap menan ne namu wadiaena orup da mek aro mega gapan inanap ya oneta go Mamana imu pose entan tapi gapan amba oneta.”

<sup>66</sup> Wam mame use aeni gapan wadiamot mega upi tandayasen ae vean, amba ewap da sia ya amon. <sup>67</sup> Iesu apan aonagaet pusinawan derewa anega wayawamon, “Endi e den ae venek aiset anuiwanin go?” <sup>68</sup> Amba Saimon Pita garewa wadien, “Ayop, nu aneta da menan anait? Ge nop gegawa megenat yaibobot inagewa. <sup>69</sup> Nu anuton anu tumat taivin ge God watu eneni potaga woup seni apanewa daiton iragenawa.”

<sup>70</sup> Iesu entan gare wan, “E aonagaet pusinawan derewa nagirewa om ne enuyen. Go e yaumakayap orup daiton megenat koerage.”

<sup>71</sup> Iesu ame wani Diuda apan Saimon Iskeriot otua menan wan. Me apan aonagaet pusinawan derewa ame da go evi me Iesu ominewa wata.

## 7

*Iesu Isurero barip muga da aen*

<sup>1</sup> Mame ewap, Iesu at Galili gapan ikukuk tau ge tau aen, amba at Diudia den ya aen iwa Diu nagirewa togurapen amase ap mepe taiwanumune.

<sup>2</sup> Go wam ame Diu nagire dugup wanup gapan tune baripe konintu tan. <sup>3</sup> Iesu gwani waiwa denip mega daitonawa me inap anega wane, “Ge at ma ae ve amba at Diudia ak, ap me gapan wa ewamot gegawa Diudia gapanawa yo paua ugup ugup gega yawain. <sup>4</sup> Iwa orup ansena da yaua aroga tauat anuiniwa karaua ya tata. Ap menan wataget ge inak ugup ugup taingiana, gek ingane piup ma to ewat.” <sup>5</sup> Iesu mek gwani waiwa anu tumat da me inap ya tane menan ap anega wane.

<sup>6</sup> Go Iesu inamup wan, “Wam nega tamanawa ya di onen tauia, go wam ega union da di.

<sup>7</sup> Piup ma e ya tandayat imaiwan, go ne tandayat nimanegiwan iwa mu koewa muga wat arogam mumivin. <sup>8</sup> E barip gage aisen. Ne endi barip ame gage ya di dot ongain, iwa endi mame ne wam nega tamanawa da uon.” <sup>9</sup> Mame wani ewap me Galili gapan wande en.

<sup>10</sup> Ap menan, gwani waiwa barip menan amone ewamup, me den aen, aroga uon, go karaua. <sup>11</sup> Endi yawat mega barip ame gagap Diu nagirewa Iesu menan yangut tan singui waiwanumun, “Apan ame amba?”

<sup>12</sup> To iam baware ameme gapan nop simura wa agagam baraene senaren. Upi wane, “Me apan kakae” upi gare wan, “Uon, me waenapan ebo ewamuiniwa.”

<sup>13</sup> Go Iesu menan da daiton aroga ya di wane iwa  
Diu nagire tamu tane.

*Iesu barip gagap wadidiamon*

<sup>14</sup> Barip tane uon ya tan amba yaumakap Iesu  
God Paewa dot ae opata wadidiamon. <sup>15</sup> Diu  
nagirewa no i kap wane amba anega wan, “Apan  
ma anut amba anenen waren, anut yowa da ya  
tainiwa?”

<sup>16</sup> Iesu gare wan, “Dim da wadiaingina ma  
negawa uon go God watu enanegeniwa me inap  
tauen. <sup>17</sup> Da da God nop mega anu tapiwa, ne  
God amun mega gapan waivin o nek waivin, ame  
mu anuin. <sup>18</sup> Me da mek megenat menan nop  
wainiwa, mek yaua ao wabawaramepen men  
mek ingane waiwan, go da me watu eneni menan  
nao tan yaua ao wabawaramepen men tainiwa  
apan ame tavewa, ap mepe me inap ebo da  
uon. <sup>19</sup> Mosis God iup mega da enen go uon?  
Go daiton iup da amat ya taiwanin. Dimen  
wat toguranegepen menan taiwanin?” <sup>20</sup> Mu  
gare wane, “Ge airampu wa guragen. Ma da  
toguragepen taiwan?” <sup>21</sup> Iesu inamup anega wan,  
“Ne yo daiton pura bawarewa gapan tan e iragi  
yao ugu gangan anuyan. <sup>22</sup> Iwa dimen? Mosis  
God paua mega apan etuya tunapen ok seni iup  
ame enen. (Tat mega tamana di mame Mosis  
inap ya tauen go mame apan Eibaraam amba  
isimuran wainu upi den). Ap menan e orup otu  
upi etumu pura bawarewa gapan tunamoyan.  
<sup>23</sup> Orup da pura bawarewa gapan etua tunepiwa  
menan ame Mosis iup mega ya topaitayan, iwa di-  
men pura bawarewa gapan apan wat inakamena

e ugu gangan inanap taiwanin? <sup>24</sup> Guegue ase yavianawa gapan wanene ya tane, tavewa gapan wanene tan.”

*Iesu me Keriso go?*

<sup>25</sup> Nop ame gapan waenapan upi pa Ierusalem gapan singui tayawamon, “Apan ma togurapen taine apanewa? <sup>26</sup> Me mame nop aroga di waiwan, iwa dimen mu ya watanane? Ap menan Iesu me God om enuni apanewa, Keriso di anuiwanumun? <sup>27</sup> Go nu anuivin apan ma ambagan tauen, wam ame God om enuni apanewa, Keriso tauepiwa da daiton ya anuin me at ambe gapan tauen.”

*Iesu me ambagan tauen?*

<sup>28</sup> Menan Iesu God Paewa gapan yone wadidiam wandini ve anega wan, “Tave di, e ne asi giap amba den anuyan ne at Galili gapan tauan. Go God, ne kiman gapan watu enanegeni, me da e ya yao anuyan. Piupa Vitana aro amun nega gapan ya wanik angin go God tavewa iragenawa watu enanenegen gamup wanik angin. <sup>29</sup> Ne God asiginap tan iwa ne me inap tauan amba me watu enanegen.” <sup>30</sup> Ap me wani menan Iesu warapen tane, go umap uon, iwa togurapen wamewa ya di tauia.

<sup>31</sup> Ap me gapan waenapan arugataet to iam ame berip me inap anu tumat tane. Mu anega wane, “God wa watu eneni mega Keriso taue yo paua arugataet tata, go Iesu taini mini aigape orup da ya tata!”

<sup>32</sup> To iam baware ame gapan Parisi nagirewa waenapan nop simura waiwanumune anune



menan mu ge pirisi nagirewa, God Paewa amat taine nagirewa Iesu to warapen menan watu enamone. <sup>33</sup> Iesu anega wan, “Ne inayap wanigepena wam koni bobou otu da, amba boge watu enanegeni apanewa ine angain. <sup>34</sup> E yona tai, go e ya tananegai. Ne amba wanigepena e ya tauai.” <sup>35</sup> Diu nagirewa muk gare gare anega wane, “Apan ma anut mega gapan amba aepi nu me ya tanat waiwan? Me wandap Diu nagirewa ian Gurik at muga arige gapan wanumuinewa mu inamup ae wadidiamopen menan waiwan go? <sup>36</sup> Me manega waini tavewa dim da? ‘E yona tai, go e ya tananegai. Ne amba angepena e ya tauai?’ ”

*Iesu Guewa Woup Seniwa menan wan*

<sup>37</sup> Barip ame wam verisiwa gapan, Iesu ao yon wande amba nop kaimakaet anega wan, “Da da megewa pakaraepiwa, me inanap one amba kaum nap. <sup>38</sup> God nop mega namua ok anega seane, Me da da ne anu tumat nimanegepiwa, me gamup inak yaibobot, kaume urewa bobot wa taue aiwandata.”

<sup>39</sup> Iesu inak yaibobot kaumewa maibe mini wani, tavewa ame Guewa Woup Seniwa menan wan. Da da anu tumasepiwa Guewa Woup Seniwa evi da mu warain. Iwa Iesu wam ame gapan kiman ya dot aen, go evi amba Iesu kiman aepi Guewa Woup Seniwa watu en muneta. <sup>40</sup> Nop mega anuiwanumune waenapan upi anega wane, “Tave di apan ma Keriso tauapen menan God noa waini apanewa.” <sup>41</sup> Upi anega wane, “Me God wa watu eneni mega Keriso di.” Go upi gare wane, “Uon,

iwa Keriso at Galili gapan ya taueta. <sup>42</sup> God oise kakaewa namua seane ame,

Keriso, me Devit naewa, at Betiriem gapan taueta, (at Betiriem ame apanewa Devit iniwandini arewa).”

<sup>43</sup> Menan waenapan seu enun iwa Iesu gagap wane. <sup>44</sup> Upi warapen anun, go da ya to warane.

*Diu bawarewa muga anu tumat da uon*

<sup>45</sup> Menan God Paewa amase taine nagirewa ewagai amon pirisi bawarewa amba Parisi nagirewa mu singui wayawamon, “Iwa dimen Iesu ya wat onayan?” <sup>46</sup> Amase taine nagirewa aroga gare wan, “Apan daiton da nop manega ya waiwandini ame Iesu me waiwan.” <sup>47</sup> Parisi nagirewa gare kaimakaet diamon, “E waiana Iesu e den pusiap warupen go?”

<sup>48</sup> Diu namu yo yo nagirewa, iup namua anut warine nagirewa, ge nu Parisi nagirewa da Iesu ya anu tumat taton. <sup>49</sup> Uon! Go orup mondigawa, iup ya anuine nagirewa, mugenat Iesu anu tumat tane. Ai! God nemoro mega inamup wandep.”

<sup>50</sup> Nikodimas erewa gapan Iesu ine ae amba Parisi nagirewa den tobot daitonawa, singui anega wayawamon, <sup>51</sup> “Iup nuga manega waiwan, orup da namu wanene ya ta go me dim da taniwa e namu yao anun amba wanene tan.”

<sup>52</sup> Mu gare wan, “Ge den at Galili apanewa go? Ge yambuni God iup mega namua gapan yop ta, God oise waini apanewa da at Galili gapan ya taueta.”

<sup>53</sup> Ame wane gapan mu daiton daiton pa muga muga amon.

## 8

*Togane tapatap tani waenewa*

<sup>1</sup> Go Iesu tunup Olip, Ierusalem mainepewa, dot aen. <sup>2</sup> Amba mumaget iragen Iesu Ierusalem vit ae God Paewa sin gwanap namboya tauen, ap mepe waenapan iragi ikukuk nau panane me boge ae wande opata wadidiamuiwandin.

<sup>3</sup> Amba God iup mega amase tainewa ge Parisi nagirewa togane tapatap tani waenewa da waran tauan. Waen ame waenapan namumup wane yonen. <sup>4</sup> Amba Iesu anega diane, “Wadianet nugawa, waen ma togane tapatap tani menan wara tauaton. <sup>5</sup> Apan Mosis iup mega manega waiwan, ame waen togane tapatap ap anega tainiwa agima togurep boep. Menan endi ge anen wai?” <sup>6</sup> Mu singui mame waiwanumune iwa Iesu pusi warupep ebo wa gapan God iup mega da yamasepen menan. Go Iesu kaut enu nani piru gapan ok pia ae siwandin.

<sup>7</sup> Mu yaugai di singui yasiwamumune, me ao endimase anega diamon, “Endi e orup ansena koewa da inap uon wandepiwa, orup ame namu agim ware waen mame top ne yawap.” <sup>8</sup> Iesu nop ame wani amba, kaut sia enu ok piupa siwandini. <sup>9</sup> Waenapan nop mame anune menan tap daiton daiton di amuiwanumun, aeta nagirewa namu di amon. Ap menan Iesu waen ame den mugenat wanumune. <sup>10</sup> Iesu gari sia endimase waen ame anega dien, “Waenapan mapawa ambagan? Orup da koewa gegawa menan da ya wa koeragam gimagen?” <sup>11</sup> Waen gare wan, “Ayop, orup da ya wa koeragam nimanegen.”

Amba Iesu nop uiwa anega dien, “Endi ne den koewa gega gapan ya wa koeragam gimagain. Go ganawan, ak koewa da sia ya ta.”

*Iesu nop mega iwa den*

<sup>12</sup> Wam ame gapan, Iesu waenapan ame anega sia wadidiam wandin, “Ne piup ma dun ganat megawa, orup da ne evinap oniwandapinawa me ap mum sisip gapan da ya aeta go inak dune ganasewa wareta.” <sup>13</sup> Go ian Parisi Iesu diane, “Ge gek oitaga waingi amba yauga wat bawaramepen menan taingi menan nop gega tavewa uon.” <sup>14</sup> Iesu gare wan, “Ame endi nek nenan anu ta guringapenawa, ne nop oit nega tavewa di, iwa ne amba tauana arewa ge angepena arewa e oare go ne asiginap. <sup>15</sup> Piup om mega gapan e wanene tamuianawa go ne ap mini orup da inap ya tainawa. <sup>16-17</sup> E iup ega gwanap ok manega seane,

Apan evene siwa naun nop daiton dere waine ame tavewa.

Ap menan endi ne anut nega gapan wanene tapenawa tamana venaseta, iwa ne negenat ya wanik angin. Ne mamana me watu enanegeniwa den yonivin.

<sup>18</sup> Ne nop oit nega nek waivin, amba ne watu enanegeni Mamana God, sina nauiniwa.” <sup>19</sup> Ian Parisi nagirewa singui anega wane, “Ge Mamaga endi ambagan?” Iesu gare anega wan, “E ya asigiap tanegean amba den ne Mamana ya asigiap tayan, endi e asik tanegepoa e Mamana den asigip tapo.” <sup>20</sup> Iesu nop mame waiwandini God Paewa yan garaet sine mainep ap mepe opata

wadidiam wandin, ap waiwandini waenapan da ya to warapen tane, iwa wam mega iragena ya tauen.

*Iesu me piup ma megawa uon*

<sup>21</sup> Nop ap me uap Iesu sia diamon, “Ne angepena e yona taiwaniai, go ne amba angepena e ap mepe ya tauai, amba e koewa ega den borit wai.” <sup>22</sup> Iesu nop mame wani Diu nagire singui muk wa wa mutan, anega wane, “Mek ingane togurep boeta? Endi ap menan Iesu anega wan, ‘Ne amba angepena e ap mepe ya tauai?’ ” <sup>23</sup> Go Iesu aigap di waiwandin, “E aoma isira mapa ne aigap aupa, e piup ma megawa, ne piup ma megawa uon. <sup>24</sup> Ne gaset wadiaena, ne Keriso ya anu tumat tanegenewa, tavewa di, e koewa ega den borit wai.” <sup>25</sup> Mu singui wayawan, “Enda ge da?” Iesu gare wan, “Ne gaset gaset amba di wadiae angingin. <sup>26</sup> Ne wanene ega tae tae arugataet di. Go Mamana watu enanegeni apanewa nop mega tavewa di, me inap gego da uon. Amba ne nop, me gamup anuinawa ne piup ma waenapan iragi wadidiamoin.”

<sup>27</sup> Iesu Mamewa God menan waiwandini mu da ya di anu awane. <sup>28</sup> Ap menan Iesu anega wan, “Ne Kimani Vitana apanewa ao waran to endawanegene e anu awai ne Keriso di. Menan noa wainawa nek anut nega gapan ya taivin, go Mamana anen wadianegeni gapan di taivin. <sup>29</sup> Endi watu enanegeni inanap di wandia. Me ae wat, vetanegen negenat da ya waingiangin iwa ne pot pot dim da taina God anuini imua ame wabibigamina menan aton anuiwan.” <sup>30</sup> Me nop

waiwandini waenapan aruga imu pose iravi me inap waren, amba anu tumat tane.

*Koewa ayamase nagirewa*

<sup>31</sup> Ian Diu me inap anu tumasenewa, Iesu anega diamon, “Endi e nop nega wat kakayasenewa, e ne wadiaet nega iragenawa di. <sup>32</sup> Ap menan nop tave tavewa e asigip tai, amba nop tavewa ega vetaeta.” <sup>33</sup> Mu garewa anega diane, “Nu Eibaraam naewa! Nu orup da pusi nani wanawase da ya taton. Endi ame anenen vetanep tau anait?”

<sup>34</sup> Iesu sia anega wan, “Ne tavewa di wadi-  
aivin, waenapan da koewa tainewa ame koewa  
ayamase di taiwanum. <sup>35</sup> Dugup da gapan nao  
ayamat mondi kaimakaet taini otua go wam da  
ayamase apanewa dugup ame ae ve garip aeta,  
iwa me dugup ame otua uon. Go dugup ame otu  
iragenawa di wande aiwandata iwa me dugup  
megawa di. <sup>36</sup> Menan God mek otua ne vetaepen  
tau aisenewa ame di vetae kakayasen. <sup>37</sup> Ne  
anuivin e Eibaraam naewa, go endi e togura-  
negepen amase taiwanin iwa nop nega wana  
warayan potayap da ya wandia. <sup>38</sup> Ne wadi-  
aingina Mamana inap yawan anuina gapan wa-  
diaivin go e taiana ame mamaya ame wadiaeni  
gapan di taiwanin.”

*Ge mamaga da?*

<sup>39</sup> Mu gare wane, “Eibaraam nu mamana.”  
Iesu sia wan, “Go endi Eibaraam otu tasine wan-  
depiwa, e wan dim dim Eibaraam taiwandini  
ame uap taiwaniampen! <sup>40</sup> Ne nop tavewa wa-  
diaina apanewa, God no utap di anun waivin.  
Go endi e toguranegepen taiwanin. Eibaraam

ma miniwa da ya tan. <sup>41</sup> Amba ne yawaena e tat ega ame Eibaraam mini da uon, ap menan e Eibaraam naewa da uon.” Diu nagirewa anega wane, “Nu nain gagape otu tasinewa uon. Nu mamana ame God nuga megenat di.”

<sup>42</sup> Iesu anega diamon, “Go endi e mamaya God di wandepiwa, e imuya potaya nenan anu guriwaniampen. Iwa ne God inap ongen mame waingian, amba ne nek ya ongen, go God watu enanegen. <sup>43</sup> Di menan ne nop nega waingina aroga iragen ase ya anuiwanin? Iwa mamaya piupawa darinaya toboren. <sup>44</sup> E mamaya piupawa ame Seitan otu tasinewa e me. Amba e mamaya inak megawa taiwaniat anuiwanin. Wataget ere mangan me togut wagut apanewa wande en, me nop tavewa da ya wat nat wande en, ap menan me nop mega iragenawa ame ebo aopan apanewa, amba eboewa mamewa.

<sup>45</sup> Ne nop tavewa gapan waingina go e mamaya ewap aisiana menan ne ya anu tumat nimanegiwani. <sup>46</sup> Endi ne koewa tainawa, e da yao matakamiwanin? Go ne nop tavewa di wainawa, dimen ya anu tumat tanek wanin? <sup>47</sup> Orup da God otua di wandepiwa God anen wainiwa me anuta. Go e God nop mega ya anuiana menan e God otu wai uon.”

### *Iesu mek menan waiwandin*

<sup>48</sup> Ian Diu nagire gare anega diane, “Endi nu Sameria apanewa diagitoni ge airampu potagap den waintoni ame tavewa di waivin?”

<sup>49</sup> Iesu anega wan, “Ne airampu da potanap uon. Go ne Mamana viripewa taina ap mini

e virina ya taiwanin. <sup>50</sup> Ne nek yauna ya wabawaramivin go God ne virina tainiwa menan ne yauna wabawarameta. Amba me wanene taini apanewa. <sup>51</sup> Ne tave di waivin, orup da nop nega wat kapet wandepiwa me bop da inap ya taueta.”

<sup>52</sup> Ian Diu mame menan aigap doran sia wane, “Endi nu asiginup ge airampu potagap wandinowa! Eibaraam boen ge God nop mega waiwanumune nagirewa den borit wane, go endi ge anega waingiana orup da nop gega wat kapet taiwandapinawa me ya boeta? <sup>53</sup> Endi ge Eibaraam amba watageta God noa waiwanumune aigamup? Eibaraam boen amba God watageta noa waiwanumune nagire borit wane. Ge anenen, endi anuingiana ge da?”

<sup>54</sup> Iesu gare anega wan, “Go endi ne nek oya garie den wa taingapenawa oya gari ame tavewa da uon. Ne Mamanawa menan endi God ega waiana, oya oya mega neniniwa. <sup>55</sup> Ame e den God asigiap ya tayan, go ne asiginap tan. Endi ne God ya asiginap wapo ne ware ame ne umayap ebo wapo. Go ne me asiginap tana menan nop mega ayamase taivin. <sup>56</sup> E omae baewa Eibaraam Guewa Woup Seni wadien anun ame ne nao tat nega wamewa tauapen tani atonua anun. Ap menan Eibaraam bet ine yaveni aton tan.”

<sup>57</sup> Ian Diu sia anega wane, “Ge bodu gega apane dere aonagaet ya tauiagi, go ge Eibaraam yawaan?” <sup>58</sup> Iesu anega wan, “Ne tavewa di wadiaivin, ne watageta da di waingen amba Eibaraam yanen.” <sup>59</sup> Iesu nop mame waniwa mu agim tambun topen tane, go Iesu waenapan



yamamu ware karau ta God Paewa arige ae ve aen.

## 9

*Iesu apan ine potap yame boraseni wat inakamen*

<sup>1</sup> Iesu me neginaet aiwandini, apan da ine potap yame borasen yaneni yaven. <sup>2</sup> Me wa ewamot mega singui me inap anega wane, “Wadinet nugawa apan ma koewa me tani gapan go gare ine mame tane menan yame borasen yanen?”

<sup>3</sup> Iesu anega wan, “Apan ma koewa mega gapan uon den ine mame koewa muga gapan uon. Go me yame boraseni iwa megawa ame God amun mega me inap arogamepen menan ma venasen.

<sup>4</sup> Nu wam ganase wandeni gapan God, ne watu enanegeni, nao mega menawaet di tainampen, iwa mum oniwan mum gapan daiton da nao ya tata. <sup>5</sup> Ne piup ma gapan wanik anginawa, ne piup ma ganat mugawa di.”

<sup>6</sup> Anega wani ewap me giton piupa ene tan motok entanen amba tambu apan yamap ao batamen. <sup>7</sup> Iesu anega dien, “Ak, yamaga kaum awan Sailoam gapan bigi wat.” (Nop Sailoam guegüewa ame Watu Enen.)

Menan apan ae yamewa ap mepe bigi wareni, boge yame meret wan yangut ta amba pa mega aen.

<sup>8</sup> Apan ameme evene waiwa amba mu da da namu yaviwanumune inamup mupaet wan nani mese eneni, mu singui anega wane, “Apan ma daiton pot pot wanden mup tainiwa?” <sup>9</sup> Upi wane

“Ameme di.” Upinewa anega wane, “Uon, me yawat mega apan ap umap.” Go apan mek ingane wan, “Ne apan ameme di.”

<sup>10</sup> Mu anu kakayasepen menan singui wane, “Da anenen amba yamaga watapen?” <sup>11</sup> Me gare wan “Apan yaua Iesu piup upi ware motok ta yamanap batamen, me dianegen ange kaum Sailoam, gapan bigi warat wan menan angen kaum Sailoam, gapan bigi waran, boge yangut tan.” <sup>12</sup> Mu singui sia wayawane, “Apan mame endi amba?” Me gare wan, “Ne oare.”

*Ian Parisi apan anenen inakaeni aipe ketnagen*

<sup>13</sup> Apan namu yame borasen wandeniwa mu waran Parisi nagirewa inamup tauan. <sup>14</sup> Yawat mega wam ame Iesu motok ta apan yamewa watapeni ap me pura bawarewa wamewa. <sup>15</sup> Menan Parisi nagirewa singui me inap tane anenen amba yamewa kakae tan. Me gare wan, “Apan da yamana motok batamen. Amba bigi waran endi yangut taivin.” <sup>16</sup> Parisi upi anega wane, “Apan mame God inap ya tauen, iwa me pura bawarewa iup mega topaisen.” Go waenapan upi singui wane, “Anenen amba koewa taini apane yo aru baware ma tata?” Menan mu imumu tum gigit waren.

<sup>17</sup> Ap menan uuiwa gapan mu entanan apan yame boraseni inap singui wan, “Ge yamaga Iesu watapen. Endi me menan anenen waingi.” Apan gare wan, “Me God noa wainiwa.” <sup>18</sup> Go Diu nagirewa apan ame tamana di me ine potap yame boraseni, ya anu tumasene menan ine mame munan sepe amon. <sup>19</sup> Ine mame tauane amba

mu singui wane, “Mame e orup egawa? Orup ega yaneni gapan namu yame borasen? Ame anenen endi yangut taiwan?”

<sup>20</sup> Ine mamewa anega wane, “Nu anuivin me nu otunua. Amba yame borasen yaneni nu asiginup. <sup>21</sup> Go endi anenen amba me yangut taiwan, go da yamewa watapeni, nu oare. Mek singui tayawan, me orup arita di, mek ingane oit mega di wata.” <sup>22</sup> Me ine mame manega wane iwa mu Diu nagirewa tamu anune, iwa Diu nagirewa nop namu bariman wane orup da Iesu me Keriso di anu tumasepiwa ame dugup paewa gwanap warupe garip uat enain. <sup>23</sup> Ap menan ine mame ap anega wane, “Me orup arita di, mek ingane oit mega di wata.”

<sup>24</sup> Koni derewa mu apan namu yame boraseni menan wane. Mu singui anega wayawane, “God yamap tave di wa, nu asiginup apan mame koewa tainiwa.” <sup>25</sup> Me gare wan, “Me koewa tainiwa go gare uon, ne oare. Daiton megenat ne asik tana, ne yamana borasen go endi ne yangut taivin!” <sup>26</sup> Boge mu singui tayawan, “Me anenen tagen? Anenen ta amba yamaga watapen?” <sup>27</sup> Me gare wan, “Ne gaset wadiaena e ya anu warayan. Iwa dimen sia anupen waiwanin? E wa ewamot mega den entan imaep Iesu anu tumat tat anuiwanin?”

<sup>28</sup> Boge mu togo uaren tan anega wane, “Ge apan ma wadiamot megawa di! Nu wadianet nugawa Mosis! <sup>29</sup> Nu asiginup God nop Mosis inap wan go apan mame nu oare anenen da amba tauen.” <sup>30</sup> Apan gare wan, “Endi ame anenen! Me amba taueni e oare yamana me di watapen.

<sup>31</sup> E nu den asiginup God me koewa nagire nop muga ya anuiniwa. God apan tamanawa nao menan taini noa anuiniwa. <sup>32</sup> Waenapan da apan inewa potap yame borasen yaneniwa ame wat inakameni oisewa da ya wane anuton. <sup>33</sup> Menan apan ma God inap ya tauapiwa me dim kakaewa da ya di tata.” <sup>34</sup> Mame gapan mu gare wane, “Ge anenen e koewa inak ega gapan ap anegataet den yanianawa koewa ame guegue dimen wadi- aningi!” Amba mu me garip uat enane tau aen.

### *Yame borat guewa gapanawa*

<sup>35</sup> Iesu mu namu yame boraseni apanewa garip uat enane tau aeni oisewa anun amba wam da me apan ame taneni gapan Iesu anega singui wayaven, “Ge Kimani Viseni apanewa anu tumasingi?” <sup>36</sup> “Me da?” apan singui anega wan. “Wadianege amba ne me inap anu tumat tap.” <sup>37</sup> Iesu anega wan, “Ge endi mame yavingianawa, ame tave di, daiton da, mame nop inagap waiwan.” <sup>38</sup> Boge apan anega wan, “Ayop, ne anu tumat taivin,” amba me i poe Iesu inap ta wa taragasen.

<sup>39</sup> Iesu anega wan, “Ne wanene menan piup ma tauan, menan yame borat mutanewa yangut tain amba mu da yangut tainewa yame borat mutain, ame gapan ne gamunap seu enu munain.”

<sup>40</sup> Parisi upi ap mepe me den nop anen wani anun menan anega wan, “Dim da? Nu den yaman borasen?” <sup>41</sup> Iesu anega wan, “E yamaya boraseniwa, e koewa inayap da uon, go endi e yangut kakaevet tat waianawa menan koewa ega

di wandia, iwa tandayat nimanegean menan.”  
Iesu ap anega wan.

## 10

### *Man sip kwayupe taini apanewa*

<sup>1</sup> Iesu anega wan, “Ne tavewa di wadiavin, apan da man sip sin mega tonanewa gapan ya unugepiwa, go negin ugupewa gapan sin pain dore gwanap gearepi ame up ge togut wagus taini apanewa. <sup>2</sup> Go apan da tonana unugepiwa ame man sip kwayup taine i apanewa di. <sup>3</sup> Tonan kwayup taini apanewa tonan watap wanep, amba sip kwayup taini apanewa sip mega yaumu gapan gapan wap, mu noa ire anune ewap tauane amuinewa. <sup>4</sup> Ame mek man megawa iragi naumo taue garip amopiwa, me use namumup aep, amba sip mega ewap ororom warup amoin, iwa me noa ire anune menan. <sup>5</sup> Go mu apan da ugupewa evip ya di amoin, tave di, mu tap ae ve amoin, iwa apan ugupewa ame noa mu oare.”  
<sup>6</sup> Iesu gutut mame guegue anupen maibe mini waiwandin, go me wadidiam wandini mu da ya di anu awane.

<sup>7</sup> Ap menan Iesu sia wan, “Ne tavewa gapan di wadiaivin. Man sip tonanewa ne. <sup>8</sup> Namu yo yo ebo taine nagirewa namunap tauanewa ame up ge togut wagus nagirewa, ap menan man sip nomu ire da ya anune. <sup>9</sup> Ne tonan, orup da ne gamunap unuk aepiwa me inak wareta. Me ne gamunap unuge ge use taue aepi amba at kakaewa tautaneta. <sup>10</sup> Up apanewa ame up tapen ge togut wagus amba wa koeamepen megenat

di oniwan, go ne tauana ame gamunap inak wariwaniampen amba inak ame di wat kakayasi-nampen menan.”

*Iesu man sip kwayup taini i apane kakaewa*

<sup>11</sup> Iesu sia anega wan, “Ne man sip kwayup taini i apane kakaewa. Sip kwayupe kakaevet taini apanewa inak mega man sip menan wakaumepen menan anun taiwan. <sup>12</sup> Apan da man sip amasewa tan garewa den warini ame man sip i apanewa uon, menan okoi wasipen da onep yavepi, me sip ae vemon tap di aewan. Amba okoi wasipen ma tauen sip gut ise se ase se tata. <sup>13</sup> Apan ame tap aepiwa iwa, me mondi nao tan garewa warini apanewa menan. Kwayup yaentuk ya ta kakayasiwan.

<sup>14</sup> Ne man sip kwayupe kakaewa. Ne man sip iragi asiginap tamon amba mu iragi asigimup tanegene. <sup>15</sup> Ap umap sia ne Mamana ne asigip tanegen amba ne me asiginap tan amba inak negawa man sip munan wakaumain. <sup>16</sup> Ne sip nega upinewa wanumam go endi sin mame gwanap uon, ap menan ne den tambumopen sin gwanap onamot anuivin, amba mu den nona ire anupi gapan dugup daiton kwayup taini i apane daiton den wanumoin.

<sup>17</sup> Ne Mamana inanap anu guriniwa iwa megawa ame ne inak nega piup iragi munan wakaumain amba inak nega ae ma sia wat angain. <sup>18</sup> Waenapan da ne inak nega ase ya waseanegain, go negenat inak nega ae bat munain. Ne inak nega ae barae barae amun megawa ge inak nega ae ma wara sia angepen amun mega

ne gase waran. Ne inak nega ae barapena ame ne Mamana God anuni gapan di.”

<sup>19</sup> Iesu nop mame waiwandini menan, Diu, nagirewa sia ae seu enun nop mame aigap doran waiwanumun. <sup>20</sup> Upi anega wane “Me airampu tauan potap unugen menawasene bumbam tan waiwan, menan iwa dimen nop mega anupen taiwanin?” <sup>21</sup> Go upine anega wane, “Airampu apan potap unugepi nopewa wat mega map anega uon. Airampu apanewa apan yame boraseni anenen wat inakameta?”

*Diu nagirewa anu tumat ya tane*

<sup>22</sup> At Ierusalem gapan God Paewa Wat Aipakamepen Baripewa tauen, ame aunari wamewa gapan. <sup>23</sup> Iesu God Paewa sin gwanap namboya wanden. Iesu apan Solomon sewae gotugue arewa gapan ap yon iwandin.

<sup>24</sup> Diu nagirewa tauan Iesu ikukuk nau panan waiwanumun, “Ge guegue gega anupen menan nononga wandia go konintu wa wainai? Endi ge God om enuni apanewa Keriso wandepiwa, aroga iragen ase ma wadian.”

<sup>25</sup> Iesu gare wan, “Ne gaset wadiaen, go e anu tumat ya tayan. Ne yo ugup ugup Mamana yaua gapan tainawa, ame ne paua nega ta ewaiwan. <sup>26</sup> Go e ya di anu tumasiwanin, iwa e man sip negawa uon. <sup>27</sup> Ne sip nega nona ire anuina, ne iravi asiginap tamon, amba mu evinap yonane inewa. <sup>28</sup> Ne yaibobot inagewa muninawa, amba mu borit da ya di wain. Waenapan da nanin gwane gapan sia ya waseanek amoin. <sup>29</sup> Mu gaset ne Mamana ma di nenen, me waenapan iragi

aigamup. Orup da, anu tumat apanewa Mamana nani ninokap gapan sia ya warupeta. <sup>30</sup> Ne amba Mamanawa nu dere gine daiton.”

<sup>31</sup> Nop ame anune gapan Diu nagirewa agim bun topen tane. <sup>32</sup> Go Iesu anega diamon, “Ne Mamana God gamup, yo ugup ugup arugataet da ta ewaen, go endi yo ansenawa menan agima tonegepen taiwanin?”

<sup>33</sup> Diu nagirewa anega gare wan, “Nu upine menan agima ya togepen taivin, go ge nop koevet di waingi, iwa ge apan iragen di go gek waan God di waingi,” Diu nagirewa ap anega gare wane.

<sup>34</sup> Iesu gare wadiamon, “God no oise kakaewa namua ega gapan ok manega seane go uon? E piup ma god megawa diaivin.

<sup>35</sup> E asigiap God nop mega ame entan wantan da ya tata, nop mega di wande aiwandata. Ap menan God Diu namu yo yo nagirewa inamup piup ma god megawa ap anega diamoniwa nop ame tamana di. <sup>36</sup> Ap mini Mamana God wat nugut kiman gapan watu enanegeni piup ma tauan menan ne God mek otua waivin. Ap menan dimen God nop mega koevet waingat dianegiwainin? <sup>37</sup> Ne Mamana mini ya di tapenawa e da ya di anu tumat nimanegai. <sup>38</sup> Go endi ne Mamana God umap tainawa. Go ne nop nega ya di anu tumasenewa, ame ne yo nega yawan gapan anu tumat taiwanian. Ame gapan Mamana ne potanap wandia, amba ne Mamana potap waingina, anu awai.” <sup>39</sup> Ap menan sia to warāpen tane, go tap yamamu ware totnage aen.

<sup>40</sup> Boge Iesu ewagai sia kaum Jordan gamu to nuguse yamu dotoue wataget Dion waenapan



dup iam wandini arewa ame aen. Ap mepe wanden. <sup>41</sup> Amba waenapan arugataet Iesu inap tauan. Amba gare gare anega wane, “Dion yo puaa ugup ugup da ya di tan. Go dim dim da me apan Iesu menan nop waiwandini ame iravi tavewa di.” <sup>42</sup> At ame gapan waenapan arugataet Iesu anu tumasene.

## 11

### *Lasiros bop taniwa*

<sup>1-2</sup> At Betani gapan apan da yaua Lasiros vek ta wanden. Me domare wai dere ame Mata amba gwaniwa Meri. Waen Meri mame, me evi da amba kaum tutu dena ware Ayop aigap wageme amba Ayop pusiwa me igumewa gapan mut daragamen. <sup>3</sup> Menan Lasiros domare waiwa Iesu inap nop watu enan, “Ayop, naunu daiton da menan anu guriana ame vek tan.” <sup>4</sup> Nop ame taueni Iesu anuni, amba anega wan, “Vek mame koevet iragen, go iwa megawa God oya oya megawa menan venasen amba God mek otua oya oya megawa ao wareta.”

<sup>5</sup> Iesu Mata amba gwaniwa Meri ge Lasiros munan anu guriniwa. <sup>6</sup> Dena, go wam ame Lasiros vek tan oise anuni me serarat inamu ya aen go wam dere sia wande amba aen. <sup>7</sup> Boge wa ewamot mega inamup anega wan, “Nu yonane ewagai Diudia anepen.” <sup>8</sup> Mu anega wane, “Go wadianet nugawa, wata konintu Diu nagire gwara toguragepen tane, dimen sia ewagai at ame agepen taingi?” <sup>9</sup> Iesu maibe gapan anega wan, “Wam airase aonagaet pusi nawan dere

(12) ganasewa wandia. Apan da wamu yonen ap iniwa pusiwa ya enuta, iwa me piup ganat megawa gapan ini menan. <sup>10</sup> Mum wamewa megenat ap aepi pusiwa enuta, iwa ganat me inap uon.”

<sup>11</sup> Nop mame wani ewap, me use dotoue wadiamon, “Evenanua Lasiros gearen aup iniwan, go ne at ase me angep wa kandasepen ao yonep.” <sup>12</sup> Wa ewamot mega gare anega wane, “Ayop, me mondi aup iniwandapinawa mek amba kandaeta.” <sup>13</sup> Iesu apan Lasiros boeni nopewa waiwandini, go me wa ewamot mega anune aup mondigawa iniwandat anun. <sup>14</sup> Menan boge oit aroga wadiamon, “Lasiros bop tan, <sup>15</sup> go e kakaewa ega menan, e anu tumat ega wabawaramepen menan Lasiros inap menawaet ya angen. Menan ame gapan e anu tumat ega wabawaramepiwa ne aton anuin. Endi nu me inap anepen.” <sup>16</sup> Boge Tomas (yaua dawa Naturop), wa ewamot upine inamup anega diamon, “Ao yonane, Iesu den anepen me boepi nu den borit wat.”

### *Iesu me inak yaibobot ibariwa*

<sup>17</sup> Wam ame Iesu pa Betani konintu tauiwandini, oit wane anuni Lasiros boen dagupa baraene wandeni wam degede gaset uon tan.

<sup>18</sup> Pa Betani ae Ierusalem taueniwa koni otu da nonongantuk (3 kilomita mini), <sup>19</sup> Diu nagirewa arugataet Ierusalem gapan tauane, Mata ge Meri naumu boeni tanamo bagu sisi tonengamepen, naumu wakaumane menan.

<sup>20</sup> Wam ame Mata Iesu oniwandini oisewa anuni, me negina Iesu tautanapen menan aen,

go Meri pa wande en. <sup>21</sup> “Ayop,” Mata Iesu inap wan, “Ge mapa wanigepo nauna bop ya di tapo. <sup>22</sup> Go ne anuivin endi ma den di God inap mup anen wawa me geneta.” <sup>23</sup> Menan Iesu waen inap anega wan, “Ge naugawa ao sia yon wandeta.” <sup>24</sup> Amba Mata gare wan, “Ne anuivin me ao sia yon wandeta wam verisiwa gapan.” <sup>25</sup> Amba Iesu me inap anega wan, “Borit wane nagirewa inak ware ao sia yon wanumopen ibariwa amba inak yaibobot ibariwa ne me di. Me da anu tumat nimanegepiwa boeta go inak sia wareta. <sup>26</sup> Amba waenapan da da ansena ine wande anu tumat nimanek wandapinawa bop ya tata. Ge nop nega mame anu tumasingi?” <sup>27</sup> Menan Mata anega wan, “Umap, Ayop, ne anu tumasivin ame ge God om enuni apane, Keriso, God mek otua da piupa tauat wa tauana apanewa.”

### *Iesu irip wan*

<sup>28</sup> Amba mame wani ewap Mata ewagai ae gwaniwa Meri wa upe asira amon amba anega wan, “Wadianini apanewa mapa, amba me genan waiwan.” <sup>29</sup> Wam ame Meri anuni menawaet ao yone Iesu inap aen. <sup>30</sup> Endi yawat mega Iesu pa sewa ya di tauia, go me Mata tautaneni arewa gapan ap mepe wandia. <sup>31</sup> Wam ame Diu nagire Meri tanan pa wanumon bagu sisi tonengam wanumune, Meri mek menawaet ao yon wande tau aen yawane menan mu Meri ewap amon. Meri tau aeni mu anune babat gage ae irip wat anune.

<sup>32</sup> Wam ame Iesu amba yoniwandini arewa, Meri taue Iesu yaveni, Meri Iesu pusip gearen

nikapu enu amba anega wan, “Ayop ge mapa wanigepo, nauna bop ya di tapo.” <sup>33</sup> Wam ame Iesu waen Meri irip waiwandin yaveni amba Diu nagire waen tanan onamone ap menan mu den irip waiwanumune, me guewa gapan bumaga tantan anu tanen. <sup>34</sup> Amba me singui anega wan, “E amba baraeen?” Mu gare wane, “Ayop, onage yao.” <sup>35</sup> Iesu irip wan. <sup>36</sup> Boge Diu nagire anega wane, “Yawan Lasiros menan anu guriniwa.” <sup>37</sup> Go upinewa anega wane, “Me apan yame boraseni yamewa watapeniwa go anenen menan Lasiros bop gapan ya watanen?”

*Iesu wan apan Lasiros inakae ao yon wardeniwa*

<sup>38</sup> Iesu bagu sisi bumaga tantan sia anuni one babat arewa tauen. Ame dagup tonanewa gwat parata ma toboriniwa. <sup>39</sup> Iesu anega wan, “Gwat wabaim ase baraeen.” Amba Mata, Lasiros domarewa anega wan, “Go, Ayop, wam degede wandeni endi mame etua gase aninke wan.” <sup>40</sup> Boge Iesu anega wan, “Ne namu ge wadiagena ame anu tumat tawa, ge God oya oya mega yawai.”

<sup>41</sup> Menan mu gwat wabaimen ase baraene. Boge Iesu yangut ao ta amba anega wani, “Maman, ne nona anuana menan gaun inagap waivin. <sup>42</sup> Ne asiginap ge pot pot nona anuianawa, go manega waiangina, iwa wae-napan mapa yoniwanumune kakaewa muga menan, amba ge ne watu enanegeana anu tumat tanegepen.”

<sup>43</sup> Wam ame anega wani, Iesu tumban amu ve wan, “Lasiros, tau onak!” <sup>44</sup> Bop apanewa tau onen, pusi nani wanup gapan viri viri waran, gine namu pan borane ame tau onen. Iesu anega mu inamup wani, “Bop wanupewa butunagen ae veane me tau aep.”

*Iesu togurep boet wan nopewa karaua panane*

<sup>45</sup> Ap menan, Diu arugataet Meri inewa daio tauane, Iesu dim da tani yawan me inap anu tumat tane. <sup>46</sup> Go Iesu dim da tani oisewa upi amon Parisi nagire wadiamone. <sup>47</sup> Boge pirisi bawarewa nagirewa ge Parisi nagirewa kansoro muga iam iam menan wane. Iam iam gapan mu anega wane, “Endi nu dim da tait? Apan mame yo paua arugataet taiwan. <sup>48</sup> Nu manega ae veat ta aepiwa mu iragi me anu tumat tain, amba boge Rom nagirewa taue nu kansoro nuga epara muga waseamoin amba at piup nugawa waseanaine.”

<sup>49</sup> Boge mu yaumakamup apan daiton, yaua Kayapas en ame gapan me pirisi bawarewa ta wande eni nop ao ainagase anega wan, “E dim da asik ya di tayan. <sup>50</sup> E da ya di anu avisi ame kakaewa nunan apan daiton da boep iwa ame gapan piup nuga waseanepi tawa.” <sup>51</sup> Me megenat menan mame ya wan, go en ame gapan me pirisi bawarewa ta wande en menan me eviwa noa wan, ame Iesu boepi ian Diu nagire munan, <sup>52</sup> amba Diu nagirewa mugenat munan uon go God otu waiwa punanan wat amone munan den, ame gapan naumo tobot mumep daiton tapen. <sup>53</sup> Menan wam ame use aeniwa mu Iesu inak mega waseasepen menan negin yop

tane. <sup>54</sup> Ap menan Iesu Diu nagire Ierusalem gapan inamup tage aroga da ya tan. Go garewa me ewagai totnage at piup gwat mugenata arige konintu, pa da yaua Eparam aen. Ap mepe me wa ewamot mega den wande en.

<sup>55</sup> Wam ame konintu taiwandin Diu nagire Paina Yamaseni Baripewa, waen apan aruga at muga muga ae vean pa Ierusalem anu tumat iupewa ayamase tapen menan pusi nani bigi ware amon bongam bongam namu tap amba Paina Yamaseni Baripewa evi amba tugupen wa amon.

<sup>56</sup> Mu Iesu menan yangut pot pot di taiwanumun, amba mu God Paewa sin gwanap namboya yonan singui gare gare wane, “Ge anen anuingi? Iesu barip menan ya di taueta?”

<sup>57</sup> Go pirisi ayop mugawa amba Parisi nagirewa nop pusi pan pan tamone ame orup ansena da Iesu amba wandep yavepi me one oit wap amba mu amo Iesu ware panapen.

## 12

### *Meri Iesu viripewa tan*

<sup>1</sup> Paina Yamaseni Baripewa manamui wandin wam nani yamunaet yamu daiton namumup wandeni, Iesu at Betani tauen, ame apan Lasiros wandini arewa, me namu boen Iesu wat inakameni apanewa. <sup>2</sup> Map mepe Iesu taueni menan Lasiros wat inakameni baripewa tugune. Mata taba yan siwandini, taba nana watarewa ap gapan waenapan wanumune. Lasiros ap mepe den tanam wande en.

<sup>3</sup> Boge Meri oma da osewa pokarik gapan enane, ame ware tauen, me tutua aigap iragen

amba garewa mega baita da uon. Me ware Iesu pusip wa damage amba i gume tau vitane ame gapan sia mut darakamen. Amba oma ose ame tutua pa ame gwanewa iragi bararaen.

<sup>4</sup> Go Iesu wadiamot mega da, apan Diudes Iske-riot, gatawan Iesu omine wapiwa, ap mepe den wandeni, me anega wan, <sup>5</sup> “Oma ose tutu dena mame une ta moni wara waenapan purapuse uon kayakayawan taine nagirewa muna muna anenen menan? Moni ame bodu daitona garewa mega warine ame omewa.” <sup>6</sup> Me nop mame waniwa iwa me pura puse uoni nagire munan ya anuiwan go iwa me up apanewa, wadiamot nagire moni muga igewa amase tainiwa, moni me inap sine gapan up tan inak taniniwa.

<sup>7</sup> Iesu gare anega wan, “Waen ma ae veane anut mega di taiwandan. Inak tamanawa di, me oma ose tutu dena mame tasi di seneniwan, ame gapan ne iman bonigasepen tunegepi wamewa menan. <sup>8</sup> E iman kayakayawan taine nagire den nimakamup tanam waniai, go ne pot pot ya waranegiwaniai.”

<sup>9</sup> Wam koni ap gapan, Ian Diu waene apane arugataet Iesu Betani gapan wandeni yawan inewa onamon. Iwa Iesu menan megenat ya onamone go me Lasiros boen wat inakamen yon wandeni den yawapen menan onamon.

<sup>10</sup> Ap menan piriisi bawarewa yonanewa nagirewa Lasiros den topen menan noa barimene.

<sup>11</sup> Lasiros inakaen yawane menan Diu nagirewa arugataet Iesu aigaven amon anu tumat muga iravi Iesu inap bariwanumun.

*Iesu man donki gagap Ierusalem tauen wat atonasene*

<sup>12</sup> Inane woup seniwa waenapan aru ame barip ame menan tauanewa Iesu Ierusalem oniwandin oisewa anune. <sup>13</sup> Boge mu yonan oma naniwa bae nini den ketnagen tambun, amon negina tautanan ve senao waiwanumun,

Iesu ge paina iragen! God wat aipakamini Ayopewa Isurero,

God yaua gapan tauiaga!

ve senao ap anega wane. <sup>14</sup> Iesu man donki otua, namu yop ta wareni gapan, gagap wande aen, no oise kakaewa namua gapan ok seane anega wan,

<sup>15</sup> Tap ya anune, ae waenapan nega Ierusalem nagirewa,

yawan, Ayop ega, man donki otua gagap wanden oniwan.

<sup>16</sup> Mame venaseniwa Iesu wadiamot mega da ya di anu awane. Go evi amba Iesu kiman dot ae oya oya wareni gapan mame venaseni gueguewa ok namua wataget sean wane omewa gapan venaseni ame mu anu awan.

<sup>17</sup> Iesu, apan Lasiros wat inakameni, ap wamewa gapan waenapan aru ame Iesu Lasiros wat inakameni ase yawane, mu Lasiros oisewa ise wa asewa amon. <sup>18</sup> Menan waenapan arugataet Iesu tautanapen amone, iwa me yo

paua mame tan oisewa anune menan Ierusalem negine amuiwanumune. <sup>19</sup> Ap menan piri nagirewa gare gare ase ma wawa mutan anega wane, "Yawan, nu taintoniwa tavewa da uon. Endi uon, endi ase yawat mega waenapan ma gaset iragi Iesu ewap amone." <sup>20</sup> Endi Ian Gurik



nagirewa upi nimakamup ap mepe Ierusalem gapan wanumuine den barip ame gagewa wa taragasepen dot amon. <sup>21</sup> Amone apan Pilip, inewa tauan, (Pilip pa Betsaida, at Galili apanewa) mup muga inap anega wane, “Ae apan nugawa, nu Iesu yawat anuivin.” <sup>22</sup> Pilip mup ame tauen anuni boge ae Anduru wadien amba Pilip ge Anduru sia entanen Iesu wadiane.

*Iesu boepi oisewa namu wan.*

<sup>23</sup> Iesu gare wan, “Mamana God Kimani Vitana apanewa oya oya nega ao wara wara wamewa gaset tauen. <sup>24</sup> Endi ne nop tavewa di wadiaivin, tamudu makewa daiton megenat, go me pia geare boepiwa, me naewa wabawaramep aruga tata. <sup>25</sup> Apan da inak mega menan imu pose warep anu gure taiwandapinawa me inak wakaumeta, go apan da inak mega piup ma gapana tandayasiwandapinawa me inak mega yaibobot inagewa wat nat wandeta. <sup>26</sup> Orup da nenan ayammat tat anupi, me yon wande evinap onep, ne amba waingina arewa, nao nega ayamase tainiwa me ap mepe den wandeta. Orup ame nenan ayammat tainiwa Mamana menan anu gure viriwa tata.”

<sup>27</sup> Iesu sia anega wan, “Endi menan ne bu-magana vege waia, ap menan ne anen wain? ‘Maman wam koni mame gapan iana warupai,’ anega wain? Uon, ne endi wam koni mame miniwa menan tauan.” Iesu anega wan. <sup>28</sup> “Maman yauga oya oyae den ao wat!” Boge nop da kimani anega tauen, “Ne yauna oya oyae den gaset ao waran, amba yauna oya oyae den sia ao warain.” <sup>29</sup> Waenapan ame iam wanumone

nop kimaniwa ame anun anega wane, “Ma ait da kimani waia,” amba upine anega wane, “Anea nop Iesu diwan.”

<sup>30</sup> Menan Iesu anega wan, “Nop endi kimani taueni mame e inak ega menan, ne nenan uon.

<sup>31</sup> Wam ma endi ganawan piup koewa muga wanene tapen wamewa, endiwa piup ma namu yoyo taini ayopewa, Seitan, to oirenep taue garip aeta. <sup>32</sup> Go ne, piup ma gapan ne paina to endawanegepiwa waenapan iravi wa upamopen nek nenan onamoin.” <sup>33</sup> Iesu nop mame waniwa me bop mega gapan anenen ta ewamo boepi noa waiwandin.

<sup>34</sup> Waenapan ame iam wanumone ao waiwanumun, “Nu God nop mega namua gapan anutoni ame Keriso tunano di wande aiwandata. Endi ge ame anenen waingi? Kimani Viseni apanewa paina to endavep boeta? Kimani Viseni apanewa ame da?” <sup>35</sup> Boge Iesu anega wadiamon, “E dun ganat mame inayap nononga ya wandeta, dun mame wandini gapan wat aisiwanian iwa sisip taue anap antapen imaepi tawa. Apan da sisipu ainiwa me aini neginewa me oare. <sup>36</sup> Menan anu tumat ega dun ame gapan ap mepe wandep, ame menan e dun ganat ame otu waiwa entan imaep.” Iesu nop ame waiwandini uon taniwa, me boge waenapan inamup karau ta at ame ae ve aen.

### *Diu nagirewa anu tumat ya di taiwanumun*

<sup>37</sup> Iesu yo ge paua ugup ugup mame yamamup di taiwandin. Go Diu nagirewa aruga Iesu inap da ya di anu tumasene. <sup>38</sup> Mame taiwanumunewa apan Aisaia God nop mega wataget waiwandini

ame tavewa tauapen menan venasiwandin. Ame Aisaia manega sen,  
 Ayop negawa. Oit nuga mu ya anu tumasen.  
 Aro amun gega ewamoan yawan,  
 go usenagaet ya anu tumat gimak wanum.

<sup>39</sup> Iesu nop mega mu anu tumat ya di tane tavewa mega ame apan Aisaia nop mame wataget den se wan,

<sup>40</sup> God yamamu toboboren ge imu pose to musen, ap tani yamamu gapan da God yavep, ge imu pose gapan da anu avepi, amba entan God menan onamop, amba wat inakam mumepi menan tawa iragi toboboren.

<sup>41</sup> Aisaia mame wani, iwa me watagetawa Guewa Woup Seniwa gapan Iesu oya oya mega yaveni menan Aisaia no oise mame ap anega sen. <sup>42</sup> Go waenapan arugataet ge Diu davewa yonanewa upi den Iesu anu tumasene. Go mu anu tumat muga aroga ase ya wan, iwa ian Parisi nagirewa wanumone tamu tan, ap wapiwa dugup paewa gapan up oimop tau amopi tawa.

<sup>43</sup> Mu ap anega tanewa iwa mu waenapan wa atonat muga menan imumu wahren, go God wa atonat mega men imumu ya ware kakayasen.

<sup>44</sup> Menan Iesu no ainagase nop uma anega wan, "Apan da ne anu tumat nimanegepiwa, ame ne negenat ya anu tumat nimanegiwan, go ne watu enanegeni inap den anu tumasiwan.

<sup>45</sup> Me yangut ta ne yawanegepiwa, ne watu enanegeniwa den yaveta. <sup>46</sup> Ne piup ma tauana ganat di tauan, menan waenapan da anu tumat nimanegepiwa, mu sisip gapan ya wanumoin.

<sup>47</sup> Ame orup da nop nega anuiwan go me ya anun tainiwa, ne wanene me inap ya tain. Ne tauana piup ma wanene tapen ya tauan, go wat inakam mumapen menan tauan. <sup>48</sup> Go wanene apanewa den wandia menan orup da tandaeyat nimanege nop nega ya wariwandapinawa, ame wanene mega den wandia, wam uiwa gapan, iwa ne nop nega tandayasene menan. Ne nop God Mamana wadiapenawa ame waenapan wanene tamota. <sup>49</sup> Iwa den, nop ma nek ianap ya waivin, go ne Mamana me watu enanegeni ame wadiae diae ge anenen wawa ame wani gapan di waivin. <sup>50</sup> Ne anuivin God nop megawa ame up naunen yaibobot neginewa gapan aewan, ap menan ne anen waingina ame Mamana wadianegeni uap di waivin.” Iesu ap anega wan.

## 13

### *Iesu wa ewamot mega pusimu bigi waren*

<sup>1-3</sup> Den Paina Yamaseni Baripewa konintu taiwandini, wam ame gapan mum gine tabaewa naiwanumune. Amba Iesu asigip tani wam gaset tauen me piup ma ae ve amba Mamewa ine aepen. Seitani Diudes Iskeriot apan Saimon otua, inap taue Iesu omina wapen menan dien. Go God Mamewa ik amun megawa iragi Iesu sin waneni, Iesu gaset asik ta kakayasen, amba Iesu God inap taueni sia ewagai God ine aepen di anun taiwan. Iesu waenapan megawa piupa wanumunewa munan anu guriniwa menan endi me anu gurat mega tave iragenawa wadiamot mega to ewamopen tan.

<sup>4</sup> Ap menan Iesu ao yon wande, wanup mega garipe warup ase barae atup wanupewa kankamup panen. <sup>5</sup> Ame ewap, kaum kabum gapan wageme ap mepe erewa wa ewamot mega pusimu bigi waramoni, atup wanupewa kankamup paneni gapan mut daragam mumen.

<sup>6</sup> Me ta oniwandin Saimon Pita ine tauen, Pita me inap anega wani, “Ayop, ge pusina bigi di warai?” <sup>7</sup> Iesu gare anega wan, “Dim da taingina endi ma ge ya anu awai, go evi utapa amba ge asik tai.”

<sup>8</sup> Pita sia anega wan, “Uon, ge pusina da bigi ya warai.” Iesu gare anega wan, “Ne bigi ya warapenawa, ge ne upinana uon.” <sup>9</sup> Saimon Pita gare anega wan, “Ayop, pusina megenat uon go naninawa amba ianawa den bigi wat!”

<sup>10</sup> Iesu gare anega wan, “Apan daiton da dup ieniwa ame pusiwa megenat bigi wareta iwa me pusip ap aeni menan pusiwa bigip tan go me ugu wapi iragi kakae di. Endi e iravi kakae di, go orup daiton kakae uon.” <sup>11</sup> Me ame wani iwa orup da me omine wapi me asigip tan menan anega wani, “E iragi kakae go orup daiton da kakae uon.”

<sup>12</sup> Wam ame pusimu bigi waritameni, me wanup entan mega pane amba at mega gapan sia ae wanden. Amba Iesu singui anega tayawamon, “E inayap dim da tanawa e anu awayan go uon?”

<sup>13</sup> E Wadiaet ge Ayop dianek wanin ame tavewa di dianek wanin. <sup>14</sup> Menan endi mame ne ayop wadiaet egawa pusia bigi warian, e ap mini pusia gare gare bigi wariwanian. <sup>15</sup> Ne dim da tanawa ame guegue ta ewaen, e ap umap ta aisen. <sup>16</sup> Ne tave di wadiaivin, nao taini apanewa ayop mega

ya garawaseta, ap mini sep apanewa da watu eneni ya garawaseta. <sup>17</sup> Endi mame iragi asik tayana, ame taiwaniampinawa God e wat atonat imaeta.”

*Iesu omine da wapi namu anu wan*

<sup>18</sup> Iesu anega wan, “Ne da da om enuena, ne asiginap. Ne nop mame iragi inayap ya waivin, go orup daiton megenat. Ap menan ok watagetawa seane tavewa tauapen menan waivin, Orup da mapa taba nega den naini, me gariwa gamunap entani wan.

<sup>19</sup> Ya venaseni go ominana wani oisewa endi namu mame wadiaivin, menan wam ame venasepiwa e anu tumat tai ame God watu ena-negeni ame ne me di. <sup>20</sup> Nop nega mondi uon anun di waivin. Waenapan da da dugup nega watu enamopena waupamopi ne den waupanek wanum. Amba waupanegepi Mamana watu ena-negeni den waupiw anum.”

<sup>21</sup> Nop mame wani ewap Iesu bagu sisi guewa gapan anuni amba nop anega wan, “Ne tavewa di wadiaivin, e daiton da ominana wapen taiwanin.” <sup>22</sup> Me wa ewamot mega gare gare ase ma yayao mutan, anune imumu puk wan, ma da menan waiwan. <sup>23</sup> Yaumakamup wadiamot mega da, Iesu me menan anu guriniwa, Iesu mainep wanden. <sup>24</sup> Saimon Pita apan ame die anega wan, “Wayao ma da menan me waiwan?”

<sup>25</sup> Apan ame Iesu gamup ase dave me singui anega tayaven, “Ayop, orup ansena da?” <sup>26</sup> Iesu gare wan, “Apan daiton da ameme wam mame ne buredi warap sip kundaun gapan kaum pisit

antap enap wanapenawa ameme di.” Boge me buredi ware Diudes Iskeriot wanen.

<sup>27</sup> Diudes taba wareni Seitan mek menawaet potap unugen, menan Iesu Diudes die anega wan, “Dim da tat anu taana menawaet di ta.” <sup>28</sup> Go mu da daiton ya di anu awane dimen Iesu manega me inap wan. <sup>29</sup> Koni ame Diudes wadiamot moni mugawa kwayupe me taiwandin menan, upi anune Iesu barip menan taba une tapen men inap nop waiwandat anun, go upi anune gare kayakayawan nagire munat anun. <sup>30</sup> Diudes buredi ame ware menawaet tau aen. Ame muma.

### *God iup mega ewakewa*

<sup>31</sup> Diudes aeni amba Iesu anega wan, “Endi Kimani Vitana apanewa Mamana God oya oya mega wabawaramen. <sup>32</sup> Mamana God ne gamunap oya oya aigap wariniwa menan ne oya oya nega aigap wabawarameta amba ne oya oya nega menawaet di wat arogameta.

<sup>33</sup> Orup tasin negawa, ne nononga ya di tanae wanigain. E yona tai amba koni da, Diu wadiamona mini, endi sia ne wadiaivin, amba angepena ap mepe e ya onayai. <sup>34</sup> Iup ewakewa ne enivin, imuya warep baigan tan gare gare anu guriwanian. Ne enan anu gurana mini, e den anu gurat ega gare gare taiwanian. <sup>35</sup> E ek gare gare anu guriniampinawa, ame gapan waenapan iravi asik tayain ame e ne wa ewamot negawa.”

### *Iesu Pita waboborepi menan namu wan*

<sup>36</sup> Saimon Pita Iesu inap singui anega wan, “Ayop, ge amba agingi?” Iesu gare wan, “Ne amba angingina endi ge ya ongai, go evi amba

onagai.” <sup>37</sup> Pita singui sia anega wan, “Ayop, dimen endi ne ewagap ya ongain? Inak nega genan wakaumet anuivin.” <sup>38</sup> Boge Iesu gare anega wan, “Tamana di ge inak gega nenan di wakaumai? Ne tave di waivin, ge wam koni yampo waboboranegewa amba kumkum nop wata.”

## 14

### *Iesu wadiamot mega wabibigam mumen*

<sup>1</sup> Iesu anega wan, “E imuya potaya nene yangwan ya doriwandan, God inap anu tumasen, amba ne den anu tumat nimanegen. <sup>2</sup> Ne Mamana pa mega gwanewa arok arugataet da di wanumam, endi ap me da uon wandepoa, ne da ya wadiaepo. Endi ne at ega da amu watupen menan ap mepe angewan. <sup>3</sup> Amba ne ange at ega da amu watupenawa, ne sia entan ongep tambue ange ne wanigina arewa gapan ap mepe den di waninait. <sup>4</sup> Negin ae ne wanigepena arewa taueni ame e asigip tayan.”

### *Iesu me negin, ae Mamewa ine taueniwa*

<sup>5</sup> Apan Tomas Iesu anega dien, “Ayop, ge agewa arewa nu oare, ap menan negin ame nu anenen asiginup tait?” <sup>6</sup> Iesu gare anega wan, “Ne negin di, ne nop tavewa di, ne inak iragenawa di. Orup da God inap tauapen menan, negin daiton megenat ne gamunap di. <sup>7</sup> Endi e anu kakayat nimanegenewa, ne Mamana den anu kakayatai. Endi koni mame use aeniwa, e Mamana asigiap iwa ne gamunap yawayan.”



<sup>8</sup> Apan Pilip anega wan, “Ayop, Mamaga God to ewan.” <sup>9</sup> Iesu gare wan, “Pilip, wam arita mame nimakayap den di ininginawa, ge asik ya di tanegiagi? Orup da da ne yawaneginewa ame Mamana God den di yaviwanumun. Endi ge ame anenen God Mamewa sia to ewaget waingi? <sup>10</sup> Endi, ame ne Mamana potap wanik anginawa amba Mamana ne potanap wandiniwa endi ge anu tumat ya taingi? Ne nop ma ase wadiaina ame nek negawa uon go ame Mamana potanap nao wariniwa gapan waivin. <sup>11</sup> Ne ma wapenawa e di anu tumat nimanegen, ame ne Mamana potap wanik angin amba Mamana ne potanap wandia, o gare yo pua ugup ugup taingina ame gapan ase yao anu tumasen.

<sup>12</sup> Ne tavewa di wadiaivin, orup da da anu tumat nimanegepiwa, ne dim dim da taingina me ame umap taiwandata. Gosi me tapen tapiwa ame aigapewa da taiwandata, iwa ne Mamana ine angewan. <sup>13</sup> Amba dim dim da men yauna gapan mup waiwaniampinawa ne ta eningain, ap gapan ne Mamana oya oya mega aigap wabawaramain. <sup>14</sup> Menan dim dim da men anune, yauna gapan mup wane, ne di tain.” Iesu ap anega wan.

*Iesu wa agi Guewa Posewa Woup Seni menan tan*

<sup>15</sup> Iesu sia anega wan, “E imuya potaya nenan di anu guriwaniampinawa, e nop nega waran taiwaniai. <sup>16</sup> Amba ne Mamana inap mup wapen wat ago ega da sia enep tanae wande aiwandata, <sup>17</sup> ame Guewa Woup Seniwa nop tavewa waniwa. Guewa ame piup waenapan ma ya

warain, iwa mu da ya yao asik tane, go e asigiap di iwa Guewa gamunap yawayan, ame e den tanaen wandiniwa amba potayap wande aiwandata.

<sup>18</sup> Ne inanam mini ae ya wat veta veain, ne e inayap sia di ongingain. <sup>19</sup> konintu amba piup ma da sia ya yawanegain, go e di yawanegiwaniai, iwa ne inak gapan wanik angina menan e den inak gapan di waniai. <sup>20</sup> Wam ame gapan e manega anui ne Mamana potap wanik angingain e ne potanap den waniwaniai amba ne e potayap wanik angingain. <sup>21</sup> Orup da da nop nega anune warinewa, ame nenan anu gurine waene apane ap me. Ame nenan anu gurinewa garewa Mamana munan anu gureta, ne ap umap sia munan anu gurain amba ne inamup ase to ewamoin.” Iesu ap anega wan.

<sup>22</sup> Menan Diudes, (apan mame Diudes Iskeriot uon go da ugup), me anega wan, “Go Ayop dimen ge nugenat to ewanet waingi, iwa dimen waenapan den ya to ewamoi?” <sup>23</sup> Iesu gare entane sia wan, “Orup da nenan anu guriniwa, ame opata nega wariwandata. Mamana me menan anu gureta amba nu me inap tauat den tana waninait. <sup>24</sup> Go orup da nenan ya anu guriniwa, ame nop nega ya anu taiwandata. Amba opata ma anuiana ame nek negawa uon, ame Mamana watu enanegeni nopewa.

<sup>25</sup> Nop arita ugup ugup wadiae ongingina amba endi mame den tanaen waingena gapan wadiaen. <sup>26</sup> Go wat ago egawa ame Guewa Woup Seniwa, ame Mamana yauna gapan watu eneta, me dim dim iravi wa ewaeta, amba ne anen wadiaenawa imuya den wa aveta. <sup>27</sup> Nonup nega inayap ae

viangin, nonup nega eniangin. Piup ma nonup mega eniniwa tavewa uon, ame mini ne ya eniangin, menan potaya nene yangwan ya dorep, tap den ya anuiwanian.

<sup>28</sup> Ne wadiaena e gase anuyan, ame ‘Ne angepena amba e inayap ewagai sia tauain.’ E nenan di anu guranewa ne Mamana menan angepena e daramuya wata, iwa Mamana ne aiganap amba ne me gauarap.

<sup>29</sup> Ne mame endi wadiaingina evi amba venaseta, ap me venasepiwa e yawan anu tumat tai. <sup>30</sup> Endi e den nop nononga ya wa nonongamain. Iwa piup ma ayopewa, Seitan, oniwan. Go ne me aroewa da ya wat nat nimanegeta, <sup>31</sup> Go ta koeragam nimanegeta. Ame gapan waenapan iragi yao asik tap ame ne Mamana menan anu guran amba Mamana nop waini no usewa gapan gapan di taivin. Endi onaene at mame ae di ve anepen.” Iesu ap anega wan.

## 15

### *Oma wain maibewa*

<sup>1</sup> Iesu wa ewamot mega anega diamon, “Ne oma wain kaimewa mini di, amba ne Mamana nao i apanewa. <sup>2</sup> Naniwa ansena da makewa ya iamopiwa Mamana ketnagen ae siniwa. Naniwa ansena make iwandapinawa ayane warep makewa arugataet den sia iamopen menan. <sup>3</sup> Endi menan inayap nop wainginawa ame gapan e gaset kakae tayan.

<sup>4</sup> E ne den wanien, amba ne e den waningain. Ap mini naniwa da mek megenat wandepiwa

makewa ya ieta, go oma naniwa ame, oma wain kaimewa ni enoa gapan enasepi makewa ieta. Ap mini sia di e ne inanap ya wanienewa, e makewa ya iai.

<sup>5</sup> Ne wain kaimewa mini di. E damik naniwa. Ne den uon e dim da da ya tai. Ap menan apan ansena ne den ya wandepiwa amba ne me den ya wanigepenawa, me makewa da ya ieta. <sup>6</sup> Apan ansena ne den ya wandiniwa, me yawat mega naniwa wae inen geariniwa mini, naniwa ap me ae ma tambune oma yame gapan uasine yagimuuniwa. <sup>7</sup> Ne e den wanigepenawa, amba nop nega inayap wandepiwa, dim da men anu mup wanewa ameme Mamanua God eneta. <sup>8</sup> Ne Mamana oyaoewa wabawaramepen menan e makewa arugataet ian, ame gapan e ne wa ewamot negawa ek ingane to ewat taiwanian.

<sup>9</sup> Mamana nenan anu gurini mini, ne enan anu guran. Endi anu gurat nega potap wanien. <sup>10</sup> Ne Mamana nop mega ayamase tan menan ne me anu gurat mega potap wainginawa. Ap mini e nop nega ayamase taiwaniampinawa, anu gurat nega potap wanien, <sup>11</sup> Ne mame wadiaena iwa aton nega e potayap no dotouep, amba aton egawa mame bararaep umayap tata. <sup>12</sup> Ne nop nega ayamase tat mega mam, Ne enan anu gurana mini, e baigan tan gare gare anu guriwanian.

<sup>13</sup> Orup da me evene wai munan inak mega bop gapan wakaumepiwa, baigan anu gurat ap mini, ame aigap iragenawa. <sup>14</sup> Iup nega wapena taiwaniampinawa, e ne evenan wainawa. <sup>15</sup> Endi ma e ne nao nagire ya diaivin, iwa nao apane

ayop mega nao anenen taini yaunewa me oare. Garewa, ne evenan waina diaivin, dim dim iragi Mamana inap asik tanawa gapan ne wadiena e gaset asik tayan. <sup>16</sup> E ya om enu nimanegean, go ne e om enuen. E om enuena iwa e aisen makewa iwaniampen, amba makewa ega ame nononga wande aiwandata. Amba dim da ne yauna gapan mup wanewa Mamana eneta. <sup>17</sup> Mame ne nop negawa di gare gare anu guriwaniampen.

*Wa ewamot piup ma tandayat mumen*

<sup>18</sup> Piup tandayat imaepiwa, iaya barao anun, iwa mega ame namu ne tandayat nimanegen. <sup>19</sup> E piup megawa di wanienewa, piup enan anu gureta iwa e piup megawa. Go ne om enuen menan e piup megawa uon, iwa ap menan piup tandayat imaiwan. <sup>20</sup> Nop inayap waingina sia anun, Nao apanewa aritawa mega da ya garawaseta. Menan mu nop negawa ayamase tapiwa, ap menan egawa ayamase den tain, go mu ta kokoeragam nimanegepi, mu den ta kokoeragam imayain. <sup>21</sup> Mu negin manegawa gapan inayap tain iwa e ne yauna gapan taianawa amba mu God watu enanegeni mu oare. <sup>22</sup> Go endi ne tauana amba wadiamona go mu nop nega tandayasene, menan mu koewa muga wandia amba ebo aopane wawa da uon. <sup>23</sup> Me da tandayat nimaneginiwa Mamana den tandayasiwan. <sup>24</sup> Amba sia, ne yo dim da da tana mu nimakamup apan da ap mini ya tainiwa, go mu ne yo nega ya anu tumasiwanum, menan mu koewa muga wandia. Iwa endi yo aruga ma yawane go Mamana dere tandayat nimanwanum. <sup>25</sup> Go mame

venaseni God oit nop mega namua gapan ok anenen seane tavewa venasepen,

Mu tandayat nimanegene, go tavewa da uon.

<sup>26</sup> Ne Mamana inapewa Guewa Woup Seniwa watu enapena ame inayap taueta. Ame Guewa tavewa iragenawa da Mamana inap tauen ainiwa, me ne inak nega tavewa ta ewamota. <sup>27</sup> Amba e den ne inak nega tavewa ta ewamuiwanian iwa e erewa gapan tananegean ma onaninton.” Iesu ap anega wan.

## 16

<sup>1</sup> Amba Iesu sia wan, “Endi nop arita mame wadiaingina anu tumat ega ya wakaumepen menan.

<sup>2</sup> Tave di wam da oniwan, mu dugup paewa gwanap up oiep tau aitai, amba orup da gurae boniga seae amba me manega anuta, ‘Ne yan aiman garaet God wanivin.’ <sup>3</sup> Mu inak koe koe mame inayap taiwanumain iwa Mamanawa go gare ne mu asigimup ya tane. <sup>4</sup> Ne mame wadiaena menan wam da tauapi ame ne tagigiraya wana e ase anu awai.” Iesu ap anega wan.

### *Guewa Woup Seni nao megawa*

Iesu sia anega wan, “Nop mame erewa gapan ya wadiaena iwa ne inayap den waingena menan. <sup>5</sup> Go endi ne me watu enanegeniwa ine angewan, go daiton da singui anega da ya wayawanegean, ‘Ge amba agewan?’ <sup>6</sup> Nop aruga mame waingina menan e bagu sisi den anuiwanin. <sup>7</sup> Go ne tavewa di wadiaivin. Ame e kakaewa ega menan ne angewan. Ame ne da ya angepenawa, ne e wat ago ega Guewa Woup

Seniwa da enan ya watu enapen oneta. Go ne angain amba me watu enain.

<sup>8</sup> Amba wat ago egawa ame tauapiwa, me waenapan mu koewa muga wat matagamep mu anuin, amba God negin mega tamanawa wat matagamep mu anuin, amba den God wanene mega wat matagamep mu anuin. <sup>9</sup> Koewa muga wat matagamepi iwa iragena ame waenapan ya anu tumat nimanegiwanum. <sup>10</sup> God negin mega tamanawa wat matakamepi iwa mega ne God negin mega tamanawa taitamen menan ne Mamana God ine angewan. <sup>11</sup> Amba God wanene mega wat matagamepi iwa piup ayopewa, Seitan, God wanene mega gapan tauen wandia, ap mini God piup nagirewa wanene tamota.

<sup>12</sup> Ne nop arugataet da wadiae diae di, go e da ya waran tanau aisene umap. <sup>13</sup> Wat ago ega, Guewa Woup Seniwa, nop tavewa megenat di wainiwa, me amat taep tavewa gapanat ta aisiwaniyai, iwa mek anuini nopewa ya wadi-diewandata go me nop kimani wadiane noa gapanat di waiwandata, amba utapa venasepi nopewa den wadidiewandata. <sup>14</sup> Guewa Woup Seniwa ap me di nop negawa da ware inayap taue wadiap amba e asigip tai. Ap gapan oya oya nega wabawarameta. <sup>15</sup> Dim dim iragi Mamana megawa iragi ame negawa di. Endi ap menan ne anega wana dim dim iragi negawa ame Guewa Woup Seniwa ware to ewaep iravi asigip tai.”

*Iesu wadiamot mega bagu sisi muga wat entanen aton tauen*

<sup>16</sup> Amba Iesu sia anega wan, “Wam koni otu da e da sia ya yawanegai, amba ame ewap wam koniwa da e sia yawanegai.” <sup>17</sup> Ap anega wani gapan Iesu watu enamot mega upi gare gare ase ma wawa mutan anega wane, “Iwa dimen nop map anega wani, koni otu da nu sia ya yawait, amba koni otu da nu me sia yawait, amba me Mamewa inewa aeta?” <sup>18</sup> Mu nop ame anupen men di waiwanumun, “Me nop wam koni otu da wani tavewa dim da? Nu nop ma wani nu ya di anu avianit.”

<sup>19</sup> Iesu yawamoni nop mame menan singui wayawapen taiwanumune menan me anega di-amon, “Endi ne manega wana, wam koni otu da e da sia ya yawanegai, amba ame ewap koniwa da e sia yawanegai, ap menan gagap dorayan din wanauiwani? <sup>20</sup> Endi ne nop tavewa di wadiaivin, e iman irip turup wan bagu sisi warai, go piup ma da da aton taiwanumain, e bagu sisi warai go bagu sisi ega aton entaneta. <sup>21</sup> Ap mini waen da orup baraeni vegewa anun, iwa orup bare bare wamewa taueni menan. Go me orup mega yaneni me vek wat ire taiwandini imu borasen, iwa orup mega yaneni atonu tani menan.

<sup>22</sup> Menan e den, endiwa bagu sisi den wara wara wamewa, go ne sia yawaepena e aton tai, amba waenapan da aton ega ya waseae amoin. <sup>23</sup> Wam ap me gapan e wan dim dim da menan ne inanap mup sia ya wayawanegai. Endi ne tavewa di wadiaivin, e dim dim da men anunewa yauna gapan mup wanewa Mamana eneta. <sup>24</sup> Oniwandine endi ma taueni, e dim dim



da mupewa yauna gapan da ya wayan. Mup wanewa e warai amba aton ega di wande aiwandata.

<sup>25</sup> Ne nop maibe gapan wadiaingin. Ame wadidiaingina iwa tavewa ukum umingin endi wam oniwandin nop gutut map anegawa da sia ya wain. Go Mamana oisewa aroga ase wadiain. <sup>26</sup> Wam ame yauna gapan mup waiwanian go enan ne dim da da Mamana inap mup ya wayawain. <sup>27</sup> Uon, iwa Mamana e enan mek imua waren menan me mup ega garewa eneta. Mamana enan imua waren iwa e nenan imuya wareni menan, amba anu tumat tayana ne me inap di ongen. <sup>28</sup> Tave di, ne Mamana inap ongen piup ma posewa unugen, endi ne piup ae viangin Mamana inewa sia angewan.” Iesu ap anega wan.

<sup>29</sup> Boge Iesu wadiamot mega anega wane, “Endi ganawan nop aroga iragen waiagi nop ukum da sia ya umiagi. <sup>30</sup> Endi nu anuivin ge wan dim dim iravi anuitamean menan ge anuingiana orup da singui tangui ya wayawaget anuingi, iwa ge namu me singui mega anuan amba me evi wata. Mame taana menan nu anu tumat taianit ge God inap di ongean.” <sup>31</sup> Iesu gare ap anega wan, “Tamana di, anu tumat taiasi? <sup>32</sup> Go wam oniwan, amba gaset tauen, amba e punanan waran daiton daiton pa ega ega aitai. Amba e negenat wat veta aroga venegai go ne negenat ya wanigain, ame Mamana inanap den wandia.

<sup>33</sup> Ne wan dim dim mame wadiaingina, ame gapan ne gamunap e nonup warai. Piup ma gapan itan bobon aritavet eniwan. Go imuya

potaya gan tumban amu yonane bigarep, iwa ne piup ma aroewa gaset ae wabigamen.”

## 17

### *Iesu mek ingane menan mup wan*

<sup>1</sup> Iesu mame wani ewap, me kimani yangut ao ta amba mup wan, “Maman, wam gaset tauen. Otugawa oya oya nega ao wat, gare ne ge oya oya gega ao warain amba waenapan to ewamoin. <sup>2</sup> Iwa ge aro epara waenapan kwayup tamopen menan nenaana ap menan mu iragi da da ge nenaanawa ame ne inak munain. <sup>3</sup> Endi inak yaibobot mam, Ame mu asik tagepen ge God daiton tave iragenawa amba ne, Iesu Keriso, ge watu enanegeanawa ameme asik tapen. <sup>4</sup> Ne piup ma gapan tauan nao nenaana taitamena gapan oya oya gega wat bawaramen. <sup>5</sup> Ap menan endi, Maman, oya oya nega ge ao wat, namu gende wainintoni piup ya venaseni gapan ap umap omewa inep.” Iesu ap anega mup wan.

### *Iesu wa ewamot mega munan mup tan*

<sup>6</sup> Iesu sia anega mup wan, “Ne wa ewamot negawa piup ma gapan nenaana inamup wat matakam gimagen. Mu iragi gegawa, go ge nenaana amba mu nop gega ayamase tane menan. <sup>7</sup> Endi mu asik tane wan dim dim ge nenaanawa ame iragi ge inagap tauiwandum. <sup>8</sup> Menan nop ge nenaana ne wadiamona amba mu warane. Ap menan mu den gaset asik tane ne ge inagap tauan, amba mu anu tumat tane ame ge watu enanegean. <sup>9</sup> Ne mu munan mup waivin. Ne piup ma gapan waenapan iravi munan mup ya waivin,

go wa ewamot nagirewa ge nenaanawa munan mup waivin, iwa mu iragi gegawa. <sup>10</sup> Waenapan negawa ame gegawa, amba waenapan gegawa ame negawa, amba oya oya ne inanap tauiniwa ame mu gamumup oniwan.

<sup>11</sup> Ne piup ma gapan nononga ya wanigain, go endi ne inagap ongivin. Go mu piupa sia di wanumoin, menan Mamana potaga woup seniwa, ge yauga aroewa nenaana gapan papat munan ta mu daiton tap ame nu gende daiton taton mini. <sup>12</sup> Ne tanamon wanigena wamewa ne papat munan tan amba kwayupamu yambuni tan yauna ame nenaana gapan. Daiton da ya wakauman. Go at koewa aepen menan yaneni apanewa megenat wakauman, iwa ame gapan God ok namua seane tavewa venasepen menan.

<sup>13</sup> Konintu ne inagap ongain, go piup ma gapan wanigen nop nega ma wainginawa, menan ame mu aton nega warep potamu no dotouep inamup ene pone inep. <sup>14</sup> Ne nop gega munan menan piup ma tandayat mumane, iwa mu piup ma mugawa uon ap mini ne den piup ma megawa uon. <sup>15</sup> Mup nega waingina ame wa ewamot negawa piup ma gapan ge tam agepen menan uon go ame ge papat muga tapen koewa apane, Seitan, ya maninamopen menan. <sup>16</sup> Mu piup ma mugawa uon, ap mini ne piup ma megawa uon. <sup>17</sup> Maman, nop gega tavewa gapan mu wat aipakam kakayat mum. <sup>18</sup> Ge piup gapan watu enanegeana mini, ne piup gapan watu enamon. <sup>19</sup> Ne wa ewamot negawa wat agoat mumapen menan ne nek ingane wat aipakamen, ap gamup mu waenapan

piup ma gapan wat agoat mumapen menan ne nop gega tavewa gapan wa ewamot negawa wat aipakam kakayat mumain.” Iesu ap anega mup wan.

*Iesu anu tumat nagirewa iragi munan mup wan*

<sup>20</sup> Iesu sia anega mup wan, “Ne mup nega, wadiamot nega mugenat munan uon, go mu gamumup da da anu tumat tanegepi munan den. <sup>21</sup> Amba mu den iragi daiton tapen menan. Mamana, ge ne potanap wanik agi amba ne ge potagap wanik angin ap mini munan mup waivin mu den tanane wanumoin ap me gapan piup nagirewa anu tumat tanep ame ge ne watu enanegean.

<sup>22</sup> Oya oya ame ge nenaana ne munan ame gapan nu daiton taton mini mu den daiton tap. <sup>23</sup> Ne mu potamup wanigepen amba ge ne potanap wanigepen ap gapan mu den uruga naumo one tobot tamo kakayasep amba piup nagirewa ame ge watu enanegeana ame mu anu tumat tain. Menan piup nagirewa manega anuin, nenan anu guringiana mini anu tumat nagirewa munan anu guringi.

<sup>24</sup> Maman, kiman piup ya venaseni gapan ge nenan anu guringian menan oya oya nenaana. Endi ne manega anuivin, orup da da nenaanawa ne amba wanigepenawa ame mu den tanamo wanigain ame gapan oya oya ge nenaana ame ganasewa mu den yavep. <sup>25</sup> Maman kakae iragenawa, piup anu waramat tagiwanum go ne anu gimagivin amba anu tumat taine nagirewa asigimup ame ge watu enanegean. <sup>26</sup> Ge inak

gega ne wa ewamona amba sia di wa ewa-  
muingain ap me gapan baigan ne inanap tain-  
giana ame mu inamup wandep amba ne nek mu  
potamup waingain.” Iesu ap anega mup wan.

## 18

### *Iesu ambot warane*

<sup>1</sup> Iesu Mamewa inap mup wan uon tani, me wadiamot mega tanam at bumak nape da yaua Kidron, Ierusalem mainap konintu di, ame to nuguse asepagan dotou amon. Yamu asepagan ap mepe nao egak da wande en, amba Iesu wadiamot mega den egaga dotou amon. <sup>2</sup> Endi apan Diudes Iesu omine wani, at ameme asigip tan, iwa Iesu wadiamot mega den wam wam pot pot gapan ap mepe iamiwanumun.

<sup>3</sup> Ap menan Diudes, Rom ita nagire ge God Paewa amase taine nagirewa, koniwa da wat nugutan iragi tanam egaga ap mepe tauane. Mu pirisi ge Parisi aritawa yonanewa watu enamon. Mu dun iran ita gaut muga tambun tauan. <sup>4</sup> Iesu dim da inap venasepen taiwandini asigip tani menan tau ae anega wayamon, “Endi e orup ansena menan anuiwanin?” <sup>5</sup> Mu garewa anega wane, “Iesu at Nasaret apanewa.”

Iesu anega wan, “Ne me di,” (Diuda omin apanewa ap mepe den tanam yoniwandin). <sup>6</sup> Ame Iesu anega waniwa, “Ne me di,” mu tap nitue use tan pia geamone. <sup>7</sup> Iesu singui sia wayawamon, “Endi e da menan anuiwanin?” Mu anega wane, “Iesu at Nasaret apanewa.” <sup>8</sup> Iesu gare wan, “Ne gaset wadiaena, ne mame. Go endi

ne yona taiwaniampinawa, apan ma upinewa ae vemone amop.” <sup>9</sup> Inak mame venaseniwa ame Iesu gaset namu manega waiwandini, “Daiton da nenaana ya wakauman,” ame om inapen menan venasen.

<sup>10</sup> Boge Saimon Pita kereba megawa da wareni ame ware pirisi bawarewa ame nao apane mega topen tani boge darinewa nutup to kuasen, (nao apane ame yaua Malukas).

<sup>11</sup> Go Iesu Pita ase anega dien, “Kereba gega mek ae di bat! Endi ne Mamana negeni itanewa di warapen taivin, e ya watananegene!”

### *Iesu waran apan Anas inewa amon*

<sup>12</sup> Boge Rom ita anan nagirewa ge namu yoyo mugawa ge Diu God Paewa amase taine nagirewa amon Iesu to waran. Mu damiga panan, <sup>13</sup> amba waran namu Anas inewa tauan, apan Kayapas ame nemnagewa. Bodu ame Kayapas pirisi aritawa wanupe ware wanden. <sup>14</sup> Apan Kayapas ame namu Diu nagire pusi tau tau ta anega waniwa kakaewa ame Diu nagire munan apan daiton boep.

### *Pita Iesu waboboreni erewa*

<sup>15</sup> Simon Pita ge wadiamot apan da Iesu waran amone ewap amuiwanumun. Wa ewamot apan dawa ameme pirisi aritawa asigip tani menan, me Iesu den tane pirisi aritawa pa sin mega namboya unuk aen. <sup>16</sup> Go Pita tonan garip amat wanden. Amba wadiamot ame, pirisi aritawa asigip taniwa, ewagai sia taue, tonan kwayup taini waene da die amba Pita wat unuk aen. <sup>17</sup> Waen ame Pita yave anega dien, “Ge Iesu

wadiamot mega da go?” Pita gare wan, “Ae, ne ap me uon.”

<sup>18</sup> Irot waramon menan nao nagirewa ge God Paewa amase taine nagirewa epi amunu wap amba wanumopen men oma iran ikukuk nau panan iramuiwanumun, menan Pita inamup ase ae den tanamo oma irasiwandin.

*Pirisi aritawa Iesu singui yasiwandin*

<sup>19</sup> Koni ame gapan, pirisi aritawa namua, Anas, Iesu nop opata anenen wani amba Iesu wadiamot mega oit muga anupen menan Iesu singui yasiwandini. <sup>20</sup> Iesu anega wan, “Ne nop aroga iragen Diu nagirewa iragi wadiamon,” Iesu gare anega wan, “Ne pot pot nop opata waine paewa ge God Paewa gwanap wadiamuingin, ap mepe Diu iragi anupen menan iam tauiwandumun, go ne nop da karaua ya wan. <sup>21</sup> Endi dimen singuat nimanegingi? Waenapan ame nop waingin anuiwandumune ame wayawam, ne nop waingina mu asigip.” <sup>22</sup> Iesu nop mame waniwa, God Paewa amase taini apane da Iesu gine namup to arame, kaimakaet anega wani, “Endi nop garewa pirisi aritawa wadia dia nopewa map anega?”

<sup>23</sup> Menan Iesu toni apanewa inap gare wan, “Ne nop da me inap wa koeamenawa, endi nop wa koeamena ame to ewam. Go ne nop tavewa gapan di waingina ge endi di menan union ginan namun to waramean?” <sup>24</sup> Anas Iesu damiga panane wandeni boge watu enen pirisi aritawa Kayapas inewa aen.

*Pita koni derewa ge yampoa Iesu waboboren*

<sup>25</sup> Ame Pita yone oma irasiwandini, waenapan ap mepe singui inap wane, “Ge Iesu wadiamot mega da, go?” Me wabobore anega wani, “A, ne uon.” <sup>26</sup> Pirisi aritawa ame nao mega tainewa da, dugup mega daitonawa apanewa gata Pita darine to kuaseniwa, ma taue Pita wayaven, “Ae, ge apan gata Iesu den egaga yawagenawa?” <sup>27</sup> Sia Pita waboboren, me ap wani no utap kumkum nop wan.

### *Iesu Pailat namup yonen*

<sup>28</sup> Mumaget iragen Iesu Kayapas pa mega gapan wat naun ian Rom ayopewa, Pailat, ine amon. Amba Diu epimu ya wabigimet anune menan pa arita ame gwanewa den ya unuk amon, iwa mu Paina Yamaseni Baripewa wan sepi tuguin. Amba Paina Yamaseni Baripewa iupewa topaise barip ya tugupi tawa. <sup>29</sup> Menan Pailat tau garip one wayawamon, “Apan ma taparit mega dim da yawa amba wayan?”

<sup>30</sup> Mu gare wane, “Endi me koewa apane uon wandepiwa, nu endi wara ase ya genait.” <sup>31</sup> Pailat anega wan, “Ek waran anuiana iupewa gapan wanene tan.” Diu nagirewa gare wan, “Go nu orup da paina to endao endao aroewa da nu inanup uon.” <sup>32</sup> Iesu bop anenen ta paina to endavepi noa Iesu namu waiwandini ame tavewa tauapen menan nop ma venase tau aen.

<sup>33</sup> Pailat pa mega gapan unuk ae amba Iesu me inap wat tauapen wan. Iesu taueni amba me Iesu inap singui wan, “Ge Diu nagirewa ayop arita mugawa go?”



<sup>34</sup> Iesu gare wan, “Endi ame gek di anuan waingi, go gare waenapan da oitana wadiagene?”  
<sup>35</sup> Pailat gare wan, “Ne Diu apanewa da uon. Go ge dim da taana menan ge waenapan gega amba pirisi ayopewa wat nauge onam nenan?” <sup>36</sup> Iesu anega wan, “Toemu negawa ame piup ma mega uon. Ame wandepiwa, ne Diu toguranegepen menan amatana taine nagire tantanana nenan anan tain, Diu nagirewa ya waranegepen menan. Go toemu negawa at ma gapan da uon.” <sup>37</sup> Pailat anega wani, “Endi ge ayop aritawa di?” Iesu gare wan, “Ap me di waingiana, ne ayop aritawa di. Mame menan ne piup ma gapan tauan, waenapan nop tavewa anu kakayasepen menan. Tavewa mame menan ne yanan. Waenapan nop tavewa gambene wanumuinewa ame nop nega anuin.” <sup>38</sup> Pailat singui anega wan, “Nop tavewa ame dim da?”

Nop mame waniwa me sia tau garip ae Diu nagirewa anega diamon, “Ne koewa da me inap ya tautanan. <sup>39</sup> Go endi e guegue ega da inanap wandiniwa, orup da agim noke baraene wandiniwa ame Paina Yamaseni Baripewa wamewa gapan wat vetane tau aeta. Endi anuiwaniana ne ian Diu ayop aritawa egawa Iesu wat vetapen tau aeta go?” <sup>40</sup> Mu gare senao ase wane, “Me uon! Barabas watu en nun!” Barabas me ita anan koevet taiwandini apanewa da.

## 19

### *Ita nagirewa Iesu wawa koko tane*

<sup>1</sup> Boge apan Pailat Iesu gaut gane denawa gapan toiwanumat wan. Boge mu Iesu gaura

tone. <sup>2</sup> Amba ita nagirewa ipuni wagam waran Iesu iap tonat wanane. Amba wanup buinip pan wanane iwa mu piup ayop muga ap me guegue tane. <sup>3</sup> Mu Iesu inap dot amo ge amo tan, anega waiwanumun, “Kaewa kaewa Diu nagire ayop aritawa mugawa!” amba mu gine namup toiwanumun.

<sup>4</sup> Koni daiton sia Pailat tau one amba Diu nagire inamup anega wan, “Yawan, ne me naun inayap ongivin iwa ne yop tana koewa da me inap ya tanan.”

<sup>5</sup> Wam ame ita nagirewa Iesu ipuni wagam warane iap tonasen amba wanup buinip pan wanan amba waran Pailat inap tauan, Pailat anega wadiamon, “Apanewa mame!” <sup>6</sup> Mek menawaet pirisi nagirewa amba ita nagirewa Iesu yawane, mu ve anega wan, “To endawan! To endawan!” Go Pailat gare anega wan, “Apan ek waran amba to endawan. Nek nenan, koewa me inapewa ne da ya tautanan.” <sup>7</sup> Diu nagire gare anega wane, “Nu iup nuga wandia, amba iup ame wainiwa me boepen di, iwa mek ingane God otua wan.”

*Iesu ware togurep endawat wa munen*

<sup>8</sup> Wam ame Pailat nop mame anuni, boge me tap aritavet anun, <sup>9</sup> amba me entane pa mega gwanap aen. “Ge at ambe gapan tauaan?” Iesu singui wayaven, go Iesu nop gare da ya wan. <sup>10</sup> “Ge nop inanap wawa tanda taingi?” Pailat anega wan. “Ge anu avingi ne wat vetagepen go to endawagepen aroewa inanap wandia?” <sup>11</sup> Iesu gare anega wan, “Ge God aro amun ame ya genapo ge bawarewa inanap ya tapo. Ibariwa

ameme apan da ne waranega ge nanik gwanap baraeniwa me koewa megawa arita iragen.”

<sup>12</sup> Amba, Pailat Iesu vesep tau aepen tan, go Diu nagire ve uma waiwanumun, “Apan ma wat veta tau aepiwa ge Rom nagirewa bawarewa iragenawa muga Sisa evenewa uon. Iwa Iesu ayop mek tan wainiwa Sisa uewa warapen taiwan. Da ayop mek ta wapi ame ayop bawarewa Sisa anavi megawa.” <sup>13</sup> Wam ame Pailat mame wane anuni, Iesu nau tau one amba Pailat wanene watat mega gagap ae wanden, at ameme yaua gwat gwaratan tane arewa (Iburu nop muga yaua dawa Gabata diane). <sup>14</sup> Wam imanawa Paina Yamaseni Baripewa menan endi Diu nagirewa taba bongam bongam ta napen taiwanumune wamewa. Wam ame ianupe wareni gapan, Pailat Diu nagire anega diamon, “Ayop aritawa ega mam.”

<sup>15</sup> Go mu ve uma wane, “Wat asira aisen! wat aisen! To endawane boep!” Pailat singui wan, “Ne ayop aritawa ega to endawain?” Pirisi namu yoyo muga nagirewa gare wane, “Nu ayop aritawa nuga da uon go Sisa megenat.” <sup>16</sup> Pailat uiwa gapan Iesu ware munen amo to endawapen menan.

*Iesu oma korosi gapan tobatamen endawanewa*

Ap menan ita nagirewa Iesu waran amat tane. <sup>17</sup> Mu Iesu nanamasene oma korosi wat aen. Boge Iesu nau amon at yaua Apan I Kaime Arewa tauan (Iburu nop muga gapan Golugata diane). <sup>18</sup> Ap mepe mu korosi gapan tobatamen

endawan, apan dere den guramon yamu yamu dawamon amba Iesu yaumakamup.

<sup>19</sup> Apan Pailat ok tata kakayat ta munen korosi gagap tobatamen. Ok anega seni, 'Ma Iesu at Nasaret apanewa. Diu nagirewa ayop mugawa,' ok ap anega sen. <sup>20</sup> Ian Diu nagirewa aruga ok ma batnagene, iwa Iesu tone arewa pa Ierusalem konintu, amba den nop paupe yampo, Iburu nop mugawa, Latin nop mugawa amba Gurik nop mugawa gapan ok seane. <sup>21</sup> Diu piri si namu yoyo mugawa ororom warupan amon Pailat inap noyam manega wane, "Nu tanda anuivin, 'Diu nagire ayop mugawa' ya sea go anega se, 'Apan ma mek anega wan, Ne Diu nagirewa ayop mugawa' ap anega se." <sup>22</sup> Pailat gare anega wan, "Ok dim da seana, ap me di sean."

<sup>23</sup> Wam ame ita nagirewa Iesu oma korosi gapan tobatamen, mu wanup mega tambun, yan i degede seane, apan animpo om muga gapan, Iesu wanup mega gauarape megenat wänden. Wanup mame taginamene intume no usewa da uon, amba wanup nononga daiton aipa aupa. <sup>24</sup> Ap menan mu anega gare gare wane, "Nu wanup ma ya benagepen. Nu kae otu da tayawat amba da wareta." Mame tane ame God nop mega ok namua seane tavewa tauapen menan anega wani,  
Mu wanup nega yan sean ase ma tambun,  
amba wanup nega warapen menan kae tan.  
Amba ap me ita nagire tanewa.

<sup>25</sup> Iesu korosi mega mainep yoniwanumune me mek inewa, me inewa gwaniwa, Meri, apan Kolopas waenewa, amba Meri Makdalin.

<sup>26</sup> Menan Iesu inewa ap mepe yaven, amba wa ewamot da me menan anu guriniwa konintu mainep yoniwandin, menan inewa inap anega wan, “Inan kaiwan, ase me endi ge otugawa.”

<sup>27</sup> Amba wadiat mega inap wan, “Endi ma, ge inagawa.” Wam ame use aeniwa, wadiat apane mame Iesu inewa pa mega gapan kwayup taiwandin.

### *Iesu bop tan*

<sup>28</sup> Evi amba, God nop mega namua ok seane tavewa tauapen menan amba Iesu me nao mega iragi taitamen anuni menan, Iesu anega wan, “Ne megana pakaraia.” <sup>29</sup> Unup sera da kaum sisi dena yaua viniga no dotouen ap mepe wanden, menan ita apanewa wanup kauma aipa antapene puakame amba gerok ginap panen, Iesu nop use baraen. <sup>30</sup> Wam ame kaum mut mut tani, Iesu anega wan, “Iragi taitamen.” Ap gapan, me gewa tau aen nawane pae waren.

<sup>31</sup> Endiwa wam bongam bongam wamewa amba wam aigapewa Diu nagirewa pura bawarewa amba Paina Yamaseni Baripewa wamewa menan Diu nagire anune kakae uon iwa bonigawa etumu korosi muga muga gapan ya wanumopen. Ap menan, mu amo Pailat singui tayave pusimu kaimamu topapaisep menawaet borit wap amba etumu tambu vitapen. <sup>32</sup> Pailat umap wani menan, ita nagirewa tauan up apane Iesu mainap to endawane namua pusi kaime topapaisen amba up apane dawa ap anega den tane. <sup>33</sup> Go mu Iesu ine tauan yawane gaset boen menan, mu pusi kaimewa ya paitane.

<sup>34</sup> Ap menan garewa ita apane da Iesu itaya bembenip enun denip ge kaum to tamage tau visen. <sup>35</sup> Apan da ame yaveni guturewa wan, me anuni gutut ameme tavewa di. Amba yamap yaveni apanewa nop mega ame tavewa di ap menan e den anu tumat tan. <sup>36</sup> Dim dim ma iragi tan venaseniwa ame gapan God mega nop namua ok seane tavewa tauapen, ok ame manega sen, Kaimewa daiton da sep ya wan.

<sup>37</sup> Amba sia God nop namua ok dawa gapan manega seane,  
Apan daiton da mu itaya enune.  
Itaya enune nagirewa muk den me ase yawan.

### *Iesu tunewa*

<sup>38</sup> Evi amba, Diosep at Arimatia apane ae Pailat Iesu etua warapen menan singui tan. Diosep Iesu wadiat mega da, go karaua anu tumat taiwandini iwa Diu nagire tamu tan. Pailat umap wani me taue Iesu etua wat aen.

<sup>39</sup> Diosep ge Nikodimas dere amon, Nikodimas ame namu Iesu ine daio muma taueni apanewa. Apan Nikodimas ame oma ose tutu dena gotonak, yaumua Elo ge Mer, ene wat onen, itan mega puaa ik tuat dere enepi ame om inen. <sup>40</sup> Apan dere ame Iesu etua oma osewa tutu dena gapan enu iran amba wanup nononga da gapan viri viri warane. Mame tane Diu nagire borit wane tumuine guegue muga gapan tan. <sup>41</sup> At ap mepe Iesu to endawane ap mainep egak da wande en, dagup ewakewa da egaga ap mepe, dagup ameme gapan namu daiton da boeni ya baraene. <sup>42</sup> Iesu etua dagup konintu wandiniwa gapan baraene

iwa mu wam ame Diu nagire bongam bongam muga aritawa da wamewa nanamu tane.

## 20

### *Iesu dagupa baraene arewa pokaet*

<sup>1</sup> Pura namunupewa ame wam ibariwa gapan mumaget iragen, mum igoe den wandeni, Meri Makdalin yon wande dagup yawapen aeni dagup tonanewa agim wabaimene no aroga yaven.

<sup>2</sup> Boge me serarat aeni Saimon Pita ge wadiamot apan da, Iesu apan ame menan anu guriniwa, ame anega diamon, “Akae, ayop etua dagupa wat tau amba amone, endi nu oare wat amon amba baraene!”

<sup>3</sup> Menan Pita ge wadiat apan dawa dagup yawapen menan amon. <sup>4</sup> Mu dere serarat amone, go apan dawa Pita wat garawase dagup namu tauen. <sup>5</sup> Wadiat apane ame kaut enuni dagup gwane yangut tani, wanup en totnak baraene ame megenat geat wanden yaven go me ya unuk aen.

<sup>6</sup> Go Saimon Pita, taue tamana dagup gwanewa unuk aen, me wa panam baraene wanupewa wanden yaven. <sup>7</sup> Ap mepe bop taine gapan tumuine wanupewa Iesu iap ikukuk panane den wanden. Tumuine wanupewa ap me gapan wa panam baraene, mek mini wanden.

<sup>8</sup> Amba wadiat apan dawa dagup namu taueni, den sia unuk aen, yaveni amba anu tumat tan.

<sup>9</sup> Mu wataget God no oise kakaewa namua gapan Iesu bop gapan yon wandepi no oise waiwanumune ame da ya di anu awane go ma venaseni gapan mu di anu awane.

*Iesu meri Magdarin inap tauen*

<sup>10</sup> Wadiamot dere ame ewagai pa muga amon, <sup>11</sup> go Meri ewamup taue, dagup garip yone irip waiwandin. Meri iri den kaut enu dagup gwanewa yangut tani, <sup>12</sup> anea dere, wanup muga pomponugaet, Iesu etua wandeni arap wanumone. Anea daiton iap use ma wanden amba dawa pusip use wandeni.

<sup>13</sup> Mu singui wayawane, “Waen ge irip dimen waingi?” Meri gare anega wan, “Ayop nega waenapan da wat amon. Endi ne oare amba baraene wandia.” <sup>14</sup> Meri nop wani ewap to entane Iesu yoniwandin use yaven go Iesu irewa ya yao aven. <sup>15</sup> Iesu anega wan, “Waen ge, dimen irip waingi? Ge da yowa taingi?” Meri me egak i apanewa da anuni menan anega wan, “Ge ayop negawa etua wat agean go? Baraena arewa wadianege ne ange warap.”

<sup>16</sup> Iesu ase dien, “Meri.” Gine tutup Meri gambenewa to entane ian Diu nop muga gapan anega wan, “Rabonai” (nop ame guegue, Wadi-anet Nugawa).

<sup>17</sup> Ap me gapan Iesu anega wan, “Ae venek, ya waranege, iwa ne Mamana inewa sia entanen ya angen. Go wa ewamot negawa menan ak amba oitana mame wadiam, ‘Ne entanan, ne Mamanawa amba e Mamayawa, ne God negawa amba e God egawa inap angepen taivin.’ ” <sup>18</sup> Boge Meri Makdalin ware wadiamot nagire inamu aen anega wan, “Ne Ayop yawan!” amba me Iesu wadieni oisewa ase wadiamon.

*Iesu wadiamot mega inamup venasen.*



<sup>19</sup> Wam ame pura ibariwa mum gine, wa ewamot nagire iravi at daiton to dagonen. Diu nagirewa tamu anune menan tonan gin kapet tan wanumune. Boge Iesu ap mepe inamup venase anega wan, “Nonup inayap wandep.” <sup>20</sup> Mame wani ewap, me naniwa ge bembeniwa ewamon. Boge wa ewamot nagire mega aton aigap di anune, iwa mu ayop yawane menan.

<sup>21</sup> Iesu sia wan, “Nonup inayap wande ep Mama mana watu enanegeni mini, ne watu enaiangin.”

<sup>22</sup> Nop ame wani gaup aigamup upune anega wan, “Guewa Woup Seniwa waran. <sup>23</sup> E orup da koewa mega anu ae veanewa, koewa mega uon tata. E koewa mega anun ae ya veanewa, koewa mega wandeta.”

*Iesu ao yon wandeni ewap, Tomas inap tauen.*

<sup>24</sup> Endi apan Tomas (me yaua dawa Naturup) apan aonagaet pusinawan derewa apan ame da. Wam ame Iesu wadiamot mega inamup venasen, me wa ewamot upinewa den ya tanam wanden.

<sup>25</sup> Menan Tomas evi amba taueni, wa ewamot upinewa me anega diane, “Nu Ayop yawaton.” Go Tomas anega diamon, “Ne anu tumat ya taivin go me naniwa ikoko tone guinewa yawap nanina pirua wat enapenawa amba bembeniwa gwin den wat anupenawa ap gapan ne anu tumat tain.”

<sup>26</sup> Pura daiton uon tani ewap wa ewamot nagire Tomas den tanam wanden. Ame tonan iravi gin kapet tan wanumone, go Iesu taue yaumakamup yone anega diamon, “Nonup inayap wande ep.”

<sup>27</sup> Boge Iesu Tomas ise anega dien, “Nanina ma yao, nanik piru wat onak mapa bat nanina guin

wat anu. Naniga endimat bembeninap bat anu. Anu bambam ae ve anu tumat ta.”

<sup>28</sup> Tomas yone Iesu anega dien, “Ayop negawa amba God negawa!” <sup>29</sup> Boge Iesu anega dien, “Iwa ge ase ma yawanegena menan ge anu tumat taiagi. Go waenapan da da ya yawaneginewa go mu anu tumat tainewa mu wat atonat aigape warain.”

<sup>30</sup> Iesu yo paua arugataet da wa ewamot mega namumup taiwandin, go nop ap me buka ma gapan den ya seane. <sup>31</sup> Go endi nop oit mame seanewa ame Iesu me God om enuni apanewa, Keriso di, amba me God otua di, e anu tumat tapen menan. Ap anu tumat taiwaniampinawa e Iesu yaua gapan inak warai.

## 21

### *Iesu meo upa upa yo megawa tan*

<sup>1</sup> Evi da sia Iesu wa ewamot mega inamup venasen, awan Galili etop (yaua dawa Taibirias diane). Tani gueguewa manega di, <sup>2</sup> Saimon Pita, Tomas, Nataniero pa sewa mega Keina at Galili apanewa, Sebedi otu waiwa, amba wa ewamot da dere ap mepe den tobot tan wanumon. <sup>3</sup> Saimon Pita anega diamon, “Ne meo dawane angewan.”

Amba mu anega wane, “Nu ge den anait.” Menan mu iragi tau amon kabum gwanap dotouan, go mum ame dawan tane meo da ya warupane.

<sup>4</sup> Woup seni, mumaget iragen Iesu awan etop gerata yonen, go wa ewamot nagire Iesu irewa da ya yao awane. <sup>5</sup> Iesu inamup anega diamon, “Oruma, meo da upayan?” Mu gare anega wane,

“Uon.” <sup>6</sup> Menan me anega diamon, “Ia egawa kabum nutup arigewa gapan antap enane amba e upi upai.” Me wani no utap tane gapan, ia wa panan tain en amba warupane iwa meo arugataet.

<sup>7</sup> Boge wa ewamot da Iesu menan anu guriniwa Pita inap anega wan, “Ase Ayop!” Mek menawaet Saimon Pita nop ame anuni, “Ase me Ayop,” me wanup mega garipewa me namu warup ase baraeni sia ware kankamup paneni boge bup ta kauma gearen, <sup>8</sup> Wa ewamot upinewa kabum waran Pita ewap amon, ia meo no dotoueni den warupen onam wanumune, iwa kaum etoa nononga uon, damik wagu dere intum tapo om mega mini. <sup>9</sup> Onamon piup tauane gapan, meo omaya yagit wandin yawan amba taba buredi upi den yawamon.

<sup>10</sup> Iesu mu inamup anega wan, “Meo endi ma ewake upayana upi tam onaen.” <sup>11</sup> Amba Saimon Pita kabum mainep ae ia okokok warup one kaum etoa tauen. Ap mepe meo bawarewa mugenataet, apane nani yamunaet nani yamu dere apan da aonagaet pusinawan yampo (153), dena go meo arugataet ame ia da bekep ya wan. <sup>12</sup> Iesu inamup anega wan, “Onaen mumageta tabaewa nan.” Wa ewamot da singui ya tane “Ge da?” iwa mu asik tane me Ayop di. <sup>13</sup> Iesu one, taba buredi ware muneni, amba meo ap umap den sia munen. <sup>14</sup> Mame endi yawat mega wam koni yampo Iesu bop ta inakae yon wandeni ewap wa ewamot mega inamup venaseniwa.

*Iesu Pita ware God nao mega wanen*

15 Wam ame mu taba nane ewap, Iesu Saimon Pita inap singui wayaven, “Saimon apan Dion otua ma upi nenan anuiwanumune mini ge tave di nenan bumaga tantan anu guringi go?” Saimon Pita gare anega wan, “Umap, Ayop, ge asigigap ne genan anu gurivin.” Iesu gare wan, “Man sip otu nega watu muingan.”

16 Sia Iesu anega wan, “Saimon apan Dion otua ge tave di bumagan tantan nenan anu guringi go?” Saimon Pita gare anega wan, “Umap, Ayop, ge asik taan ne genan anu gurivin.” Iesu sia anega wan, “Man sip nega kwayup tamuingan.”

17 Wam koni yampoa Iesu Pita inap anega wan, “Saimon apan Dion otua ge tave di nenan anu guringi go?” Pita bumagap anu tanen iwa Iesu koni yampoa me inap singui wayaven, ‘Ge tave di nenan anu guringi go?’ Me gare anega wan, “Ayop negawa ge iragi anuitamingi. Ge asik taan ne genan anu gurivin.” Iesu gare anega wan, “Man Sip otua negawa watumuingan. <sup>18</sup>Ne nop tavewa di wadiaivin, ge wam ame tamaru gapan wanigeana gan gorogot gek ingane pana amba aget anuana gapan agingian, go apan tave tawa naniga en nonongame, orup dawa naniga damik gapan panep amba ya aget anuiana arewa wat nauge aeta.” <sup>19</sup>Iesu nop mame wani guegue ame, Pita evi amba anenen ta ae amba bop tapi ap gapan God oya oya mega wabawaramepi oisewa Iesu namu wan. Boge Iesu me inap anega wan, “Pusin wakukurup amu amu onak.”

20 Pita entane yaveni ame wa ewamot da, Iesu me inap anu guriniwa, ewamup oniwandin

yaven. (Mame da Iesu toganep dave Paina Yamaseni Baripewa nane gapan anega wani, “Ayop ma da ominaga wata?”) <sup>21</sup> Wam ame Pita yaveni, me Iesu inap singui wan, “Ayop, amba me anenen?” <sup>22</sup> Iesu gare anega wan, “Ne anupenawa me wande aiwandapina amba ne ewagai sia entan tauain, ame ge inagap anenen? Ge mek ewanap di onak.” <sup>23</sup> Iwa Iesu nop mame wani menan nop oit senare tau aen amba wadiamot megawa manega anu waramat ta wane, “Iesu wadiat mega da, Iesu me inap anu guriniwa apanewa, me ya di boeta.” Go Iesu anega ya wani, “Me ya boeta.” Go me manega megenat wan, “Ne anupenawa me wande aiwandapina amba ne ewagai sia entan tauain, ame ge inagap anenen?”

<sup>24</sup> Ne Iesu wadiat mega, yavina apanewa, ameme nop mame wadidiaivin, ok mame sivin. Ne anuivin nop mame tavewa di. <sup>25</sup> Iesu piup ma gapan yo ugup ugup baita da ya tan. Go me taniwa oisewa iragi buka gapan ok ae seapoa ne anuingina ame piup uruga gapan buka iragi arok muga umap ya di tapo.

**Daga New Testament**  
**The New Testament in the Daga Language of Papua**  
**New Guinea**  
**Nupela Testamen long tokples Daga long Niugini**

copyright © 1974, 2004 Wycliffe Bible Translators, Inc.

Language: Daga

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 21 Feb 2024 from source files dated 31 Aug 2023

086528d0-e040-5a5a-9a7a-41c08d0c645e